

求恕齋
叢書

校經室文集

五

校經室文集卷五目錄

從一品封典軍功保舉府同知于府君墓表

浙江湖州府知府李君墓表

閩君墓表

山東候補知縣署濮州知州鄧君墓表

柳府君墓表

呂松巖墓表

趙君墓表

旌表節孝孫母李太宜人墓表

夏母汪安人墓表

附致夏滌菴書

旌表節孝土默特母葉太淑人墓表

旌表節孝張母陳太夫人墓表

徐母王安人墓表

前石河鹽場大使會稽石府君墓碑

范縣學訓導崔子思先生墓碑

同知銜湯陰縣知縣王君墓碑銘

廬州府知府循良李公碑銘

宋君墓碣

韓府君墓碣

鄉飲大賓太學生趙君墓碣

王節母桑孺人墓碣

張烈婦碑文

李吉侯墓誌銘

張君墓誌銘

宛平陳公墓誌銘

桐城方先生墓誌銘

柯封翁墓誌銘

前河南巡撫李公墓誌銘

翰林院修撰陳君墓誌銘

安北馬府君墓誌銘

許州直隸州知州呂君墓誌銘

翰林院檢討王君墓誌銘

河南候補同知臺君墓誌銘

田封君墓誌銘

萬全縣學教諭張君墓誌銘

安徽涇縣知縣楊君墓誌銘

廣西補用知府前翰林院檢討王君墓誌銘

校經室文集卷五

榮成孫葆田著

吳興劉承幹校

從一品封典軍功保舉府同知于府君墓表

宣統紀元之歲今 天子恭上 皇太后徽號禮成

推恩羣臣並進爵秩既又以及其親如前代故事於是

河南分巡南汝光浙道于君滄瀾以二品銜 覃恩加

一級得 贈其考爲榮祿大夫妣皆 贈一品夫人明

年春于君以書謂葆田曰先贈榮祿公歿二十有五年

矣當日銘幽之文滄瀾以求閣學陳六舟年丈公諾而

不果爲不肖奔走風塵尙思有待以爲顯揚歲月蹉跎
深恐先德弗彰則罪戾滋深敢乞賜撰鴻文以光泉壤
世世子孫感且不朽葆田義不敢辭謹按家狀所述詳
敘行誼世系俾揭於其墓之原以貽來世贈榮祿公諱
鎰字景權一字璞山平度州人曾祖諱琮州學生祖諱
方韜太學生官直隸祁州州判父諱用中州學增生祖
父皆 贈榮祿大夫前母氏戴母氏羅皆 贈一品夫
人兄弟口人公於次爲第五生日與孟嘗君同幼卽嚴
重六歲就外傳讀書不屑爲經生章句之學年十五援
例入太學丁父憂喪葬悉依古禮其後兄弟議析居贈

公獨以義求合不得僅受田百畝奉羅太夫人定省溫
清事無鉅細稟命而後行一應鄉試不售遂棄舉子業
納賞得縣佐職以母春秋高不圖仕進居家讀書教子
務攷求古今成敗得失以期見諸行事開家塾備膏火
資聚族中子弟秀異者延師課讀月三試之前後數十
年間入庠序貢成均登賢書者歲有其人先是州中歲
科兩試寒士每以納卷投贄各費爲難贈公因倡議捐
集萬金發典商歲取其息爲生童歲科試及公車費由
是鄰邑亦多效之道光丙申丁酉州大饑人多病疫贈
公爲粥以食餓者所救活無算病者施藥死者捨棺又

勸建倉社以助振至今州食其利咸豐十一年春捻匪擾亂山東贈公倡辦團防匪知有備不入境秋間匪大至贈公與掖縣張太史弼侯學博相芝倡修膠萊河岸牆率鄉團分守賊不敢逼乃繞高密境東竄贈公因於其間完守入保又捐萬金修村堡附近數十里得免焚掠同治六年任賴巨匪合隊東下李文忠督軍追勦因采贈公議築牆膠萊河以困之當是時各軍連營數百里饋饟不至士呼庚癸東撫丁文誠統帥劉壯肅檄贈公襄辦糧臺贈公命子滄瀾等持函馳數百里聯合各邑紳耆采購轉輸由贈公設局給價兵食不置軍賴以

濟事平 奏保同知 賞戴藍翎當事致書再三敦促
出山終謝不行論者謂有魯仲連之風焉贈公長身玉
立鬚眉清疏性方嚴終日危坐無倦容教人以忠恕治
家以勤儉急人之難如治其私尤好客假館授餐客至
如歸四方知名之士或不遠千里而至以得見贈公爲
榮郡伯州牧歲時修書問治道或造廬請謁贈公每舉
地方利病閭閻疾苦詳細敷陳然公署則非公不至也
高密有湖曰百脈爲數邑積水所匯歲久淤墊言利者
以開墾之說干高密令謂可得腴田數百頃令上其事
大府檄下萊州守覆勘三邑居民懼曲防之害環集懇

罷役者數萬人令遽以集眾抗官告萊州守惠公親問
贈公弭變之方贈公爲詳陳利害並馳書告鄉老以大
府愛民於是眾散而役亦罷蓋其功德及人遠矣晚年
以家事付叔子獨披閱史書含飴弄孫以自頤養以光
緒九年冬十二月十七日卒春秋八十有六明年葬於
祖塋適室張夫人孝恭端靜先卒生子一志湘優廩生
咸豐制科孝廉方正以贈公命未與廷試次室劉夫
人事贈公及張夫人造次必以禮生子三滄瀾初名志
淹光緒乙亥恩科舉人丁丑進士歷任河南上蔡滑縣
固始蘭陽鹿邑知縣衛輝知府現官南汝光浙兵備道

志灝廩貢生現官費縣教諭志潞附貢生候選訓導又
次室邵宜人生子志潛太學生河南候補縣丞女三人
壻陳榮淮金呈瑋王成曾孫十六人長孫蓮本名蓮科
同治九年庚午並補行丁卯科舉人官安丘學訓導

欽加國子監學正銜芝裳豫河候補州同蓉裳中書科
中書荔裳候選府經歷蘅裳議敘知縣黃裳翰林院待
詔荀鶴分省布經歷藝裳分省補用巡檢芄械觀梓俱
太學生夔常觀常敬常俱太學生伯葆亦太學生仲葆業
縣丞蓋常觀常敬常俱太學生伯葆亦太學生仲葆業
儒曾孫九人道潑附貢生鴻臚寺序班星渠候選府經

歷星垓保舉分省補用知縣忠源忠燾忠熙俱太學生
忠默忠杰忠篤俱幼元孫二人贈公卒後生可謂盛矣
昔歐陽文忠瀧岡阡表謂爲善無不報而遲速有時若
贈榮祿公生雖不獲列位於朝而修善修德有功於鄉
里甚大固宜食報於其子孫今兵備君又克承先志修
其身以見諸政事遭際 盛時官爲監司逢 國大慶
褒顯其親實受 三朝之錫命 朝廷所以褒寵勸勵
臣子之意可不謂厚與于氏本吾鄉望族其先由文登
分徙平度贈公所居曰古莊乾隆末濰縣韓理堂先生
嘗設教於其家塾十餘年故于氏至今猶能世傳其學

蓋詩書仁誼之澤長矣余敘贈公事實獨詳非獨以慰
其子姓乃亦以告吾鄉里之人俾知爲善獲報亦貴有
大節可傳斯足以表見於後世嗚呼豈非然哉豈非然
哉

浙江湖州府知府李君墓表

宣統元年春二月戊辰前浙江湖州府知府李君卒於
里第春秋七十有三越明年三月將葬其門人賈恩紱
旣銘其幽劉大理若曾又爲外碑之文敘君行誼世系
詳矣其孤寶森等復以書謂葆田曰先君道義交惟年
丈爲最篤今穆卜兆宅日月有時敢乞有道之文表其

阡俾先君一生堅苦託以不朽葆田曰嗚乎吾故人也
方戊申冬君以就養來山東優游歷下與吾輩朝夕過
從忽一日驚聞兩宮升遐悲慟號泣逾時莫釋會君
刻期歸里余因抱疾不克臨歧送別豈意其溘然先逝
耶君諱念茲字慕皋鹽山人幼有異稟六歲能屬文隨
父贈朝議公就館鄉塾讀書至闕予小子章感而出涕
父喜謂有忠孝之質十一歲補博士弟子員旋食廩餼
弱冠後連丁父母憂家益貧困因授徒自給嘗假館滄
州居停袁心梅以汪龍莊全集相贈君守而行之終身
得其益同治六年舉於鄉十三年貢禮部光緒二年殿

試朝考以主事用籤分刑部年四十矣京曹故清苦君在都十年衣冠儉樸嘗徒步入公署退食之暇時與賢士大夫講學論文娓娓忘倦英雋少年多從之遊今協揆榮公大理卿劉公皆其受業門人也戊子補四川司主事充奉天司主稿絕苞苴拒勢要一矯部中積習其後竟因承審庫兵案幾爲忌者中傷庫兵者戶部銀庫賤役也皆都中大猾爲之適犯事送刑部君承審其案思痛懲之其黨上下營謀乃造爲蜚語以誣君長官遽移案他司君察知其行賄狀乃持牒與長官力爭曰司官受誣不白則奸人得計所關非細長官異詞以謝

後亦審知其實雖悔而無如何也旋題員外郎升郎中
保送御史甲午冬授浙江道監察御史君居諫垣四年
章數十上皆關國計民生尤惡吏治貪汙屢彈官邪紀
綱爲肅廣西巡撫某以事落職與藩臬兩司及臨桂守
素有隙乃倒填月日揭參三人部議至革職三人皆賢
吏也君獨奏請飭查三人皆奉 旨復職善類得以保
全此皆人之難能者戊戌秋 簡授四川雅州府知府
明年赴蜀六月調署綏定府事勤求治理在任甫十月
里不容姦人懷自勵達縣令某貪酷狡詐頗爲大府所
喜君實揭其罪願不得直君自謂行省與大府相詰讓

大府稍厭苦之君知道道難行已銳意引退適會建德
周公馥爲布政使素知君之爲人乃飭赴雅州本任是
歲庚子秋九月受篆任事先是六月間雅屬名山愚民
聞京師變起相率焚燬教民室廬次年和議成外人責
保護不力各員君竟列名其內賴全權大臣李文忠據
實駁辨卒得革職留任處分又議賠款甚巨並斬梟八
人而主名不定教民乘勢騷擾名山人人自危集眾至
數千人假名勤王本道亟請大兵圍剿君獨抗議主撫
自請單騎往諭解之上下皆力阻君弗聽攜僮僕二人
馳至其地紳耆亦來跪阻悉謝之徑前呼其眾曰吾太

守也來活若聽者歸農否則大兵四集赤若族悔無及
矣眾皆感泣羅拜悉繳旗幟軍械一夕散去是役微君
則川南糜爛無完土矣君因飛函告各軍請勿入境而
當時文武方思藉定亂以邀功乃謀株連追捕仇教之
民民懼蔓抄又轉而附盜君亟令縣屬編保甲整團練
先後擒獲眞盜初犯者宥編爲令由是積匪授首脅從
洗心名山人爲君建立生祠又勒石紀其事蜀人所謂
名山捕盜碑也君在雅州三年清訟息民平反冤獄每
一批詞張於門壁鄉民皆爭先快覩蓋君在刑部數年
律例精熟事理通達故其見諸政事者若此癸卯春有

調署眉州之檄君以屢遭讒愠遂乞假修墓歸宦襄蕭
然歸後家居一年乙巳春赴都銷假奉命出守湖州
年已七十矣而精勤耐勞過於少年下車伊始適值太
湖鹽梟滋事君督率文武竭力防禦屬境以安湖州土
產多絲其機戶率多貧民而居奇者曰縐莊皆富商大
賈往往與釐局因緣爲姦君擬平定章程盡除積弊以
利小民未果行會歲暮君一夕獨坐忽忽不樂曰吾年
踰致仕志不得行一官無補殊負初心卽手自具稿申
大府乞病歸大府固君同鄉又鄉舉同年旣允其請而
君自是浩然歸矣君與余會試同年向者同官刑部每

相見必各言所志余由部曹改外職實君教之及余以迂拙不合於時返初服君每稱其知進退之義故於濟南相見時又以余蠹解文字嘗自敘守雅州事屬余爲文以紀其實尤繾綣焉君生平好善如不及見人一善則津津樂道之賈孝廉初未知名君見其文曰此著述才也賈君謂君剛方忤世官不得遂獨觥觥大節無媿東漢名節士之概嗚呼吾於君亦云宣統庚戌春二月表

閻君墓表

君諱淑立字筆存一字晴川金鄉閻氏世有隱德父維

城縣學生文行優邃有長者稱母胡氏君生而穎異自幼讀書過目不忘出應童子試輒以詩賦冠其曹金鄉塾素不解音韻之學自君始大啟其緒咸豐十年學使者試列優等舉充辛酉拔貢 廷試未入選同治三年考取 國史館謄錄留京肄業有同年生方臨莊病歿旅寓猝無以斂君經紀其喪備至先是君嘗應同邑張明波鹺尹聘至杭州甫數月張君卒宦囊蕭然君爲文告僚友咸感其義致賻贈而後旅櫬得歸故里至是又有方君事故人莫不服君之篤於友誼其在京也從匡鶴泉先生遊學益以進及先生主講山東灤源書院招

君司書記爲諸生矜式君累年教授積有膏火資數百金爲人貸去因渡河舟沈金盡失不能償君焚其券更以好語慰之其慷慨好義類如此夫以君之學行使其早掇科第得用於時其必爲當世聞人無疑乃竟屢試不遇至光緒五年己卯始舉於鄉而君已年五十餘矣又十二年辛卯卒於單縣鳴琴書院春秋六十有三娶張孺人子二滋縣學生爲伯父後渥歲貢生女三皆適士族余與君同肄業灤源書院稱同志君之卒也邑人李奉石誌其墓今年余寓沛南君長子滋乞爲表墓之文李君又稱君天性肫摯兄乾仁早卒事嫂恭謹爲請

旌節孝如例嗟乎君細行可傳者甚多余爲表著其一二以詒其後人使後進者知所勸則君雖歿亦可以不朽於世矣

前山東候補知縣署濮州知州鄧君墓表

君諱錫瑞字舜廷鄧氏其先蓋出自漢太傅高密侯禹後至晉有荊州刺史粲別爲長沙鄧氏而君宗譜傳先世本廬陵人有唐郡侯旭湖當同光二年以征蠻至楚留居長沙遂世爲長沙著姓云自君祖父以上皆隱居敦尙節義以忠厚傳家祖父世賢父曉城有子三君其次也性聰穎讀書喜博覽修身克己思本所學以推

行於人無忤父既卒家業中落資教授以贍室家屢應
場屋試不利志益堅咸同之際粵寇擾亂半天下湖南
將帥雲興多積功至大官君乃奮然曰丈夫安能屈首
詩書終老牖下乎適丁文誠公督湘軍勦賊山東君入
黃鎮軍宗華幕爲文誠所知檄佐華軍營務處同治六
七年間山東直隸捻寇蕩平君以防守黃運兩河功歷
保知縣補缺後以同知用莫縉卿軍門聞君名以重聘
延君襄其軍事君曰舍舊而圖新於義不可終謝之君
與黃鎮軍爲賓主幾三十年喜相慶患難無不相共也
爲人孝友性成事父母生養死葬悉依於禮兄光炳早

卒事寡嫂撫兄子如己子弟承謨年少不更事負債纍纍君代償之不加督責卒致悛悔一門雍睦爲鄉邦所稱羨初任濮州值兵燹後循聲大著繼署福山縣事福山有煙台鎮爲通商口岸外洋與四方游民雜處者多君於內治外交無不咸得其宜再任濮州以光緒二十五年八月二十六日卒於任所百姓弔哭如失怙恃其得民心如此君生於道光二十年享壽六十元配胡宜人生子一福基繼配劉宜人後君九年卒君雖三莅州縣任無錙銖之積以故旅櫬寄寓十年未克歸宣統元年君弟承謨乃與君之子謀歸葬於長沙長衝後之王

家坡瑩以兩宜人耐其友某以狀介李碩愚軍門請余
爲表墓之文余與君初未相識然聞君名已久謹據狀
所敘爲撮其大要如此夫爲人佐而能忠且信於友朋
居官所至見愛旣去見思又身歿而無以爲歸資則其
廉可知視彼身雖貴顯而卒被惡名於天下者其爲賢
否何如耶嗚呼如君者亦可謂不負所學矣余是以樂
道焉

柳府君墓表

府君諱相林字懋周先世本河東柳氏後遷居朝邑趙
督鎮祖諱大榮考諱殿鼇習商業嘉道間領典商於河

南汝寧府年逾四十無子妻王氏卒娶扶溝李氏女爲繼室以扶溝爲先賢遺鄉俗樸民醇遂家焉故今爲扶溝人府君生口歲而喪父又十餘歲而母氏卒性廓達不事生人產有告貸者輒與之家遂困乏乃發憤學商賈積十數年家業日隆有四子皆令習儒術咸豐八年遭粵匪之亂商業蕩然府君顧自慰曰吾今可歸農矣所居曰呂家潭西三里莊日與田夫野老講種植課晴問雨暇則招近村人勸以爲善談前代因果事鄉里化之無犯法與爭訟者府君中年積有餘貲喜施予有義舉無不爲由是羣呼爲柳善人其後有爲賊掠逃歸者

言賊至呂家潭時相戒毋毀傷柳善人家也府君雖習商然持身廉取財必以義恥與市僧伍所常與遊者同邑張季瑞茂才李芸渠明經數人尤好從諸人問學習爲大字書法見稱於一時又嘗進諸子教之曰吾媿讀書未成所以督責爾曹者非祇爲功名計恐爾身入下流玷我柳氏家風耳及次子堂得選拔舉孝廉訓之曰爾當顧名思義他日居官臨民如妄取百姓一錢者非柳氏子孫也光緒三年中州大饑邑中待府君以舉火者常數十家府君乃買舟南下載糧數百石減價糶之以利鄉人而以其餘周戚黨所全活無算時長子澤亦

佐其事明年府君至江南界首集而得疾適澤以夜行
失道至其地得侍醫藥視含歛府君卒於戊寅三月十
一日春秋六十有四卽以其年六月葬於新塋之次王
夫人耐夫人性慈善好周濟人與府君同志敎家嚴子
堂方八歲一日自塾歸拾得柿餅一枚以奉母母怒其
歸遲以爲偷得重扑之其明大義多類此先府君二年
卒年六十有二子四長澤以侍親疾積勞故次卽堂同
治十二年拔貢舉人光緒十六年進士官山東惠民縣
知縣花翎四品銜有循聲次染次璿俱縣學生孫男五
人翰芬翰蓉並縣學生翰華癸卯舉人直隸候補同知

曾孫男五人堂今歸知府補用迭遇 覃恩誥贈祖考
爲中憲大夫又加級 晉贈資政大夫妣皆 贈夫人
堂又嘗承父母遺命捐貲助振奉 旨給子樂善好施
字準於里門建坊可謂善成府君之志者矣及是述其
先考妣事略屬葆田爲表墓之文且言曰扶溝在前明
有杜善人見歸震川集中先府君行實未知視杜善人
何如今歿已三十餘年而邑人猶稱道不衰願得宏文
如歸氏者以傳諸不朽葆田竊聞歸熙甫有言天厚人
之有德將以興其家不在其身必鍾於其子若孫然非
困窮淹鬱則亦無以大發於後柳府君再困而再興又

以行善故歿於道路其理若有不可知者然身雖歿而
名愈彰躬膺二品 封贈子孫遞興而未艾豈非所謂
爲善之報耶余據太守所述府君嘉言懿行與其內教
可法者撮其大要俾異時治國聞之士知府君之所以
得傳者固自有在傳曰天道無親常與善人柳君其益
知所勉哉

呂松巖墓表

君姓呂氏諱憲棟字隆甫松巖其別號也呂氏爲萊蕪
大姓君祖父諱清臨隱德不仕生子四長傳誦次傳訓
卽君父以五世同堂受 旌表次傳誥咸豐五年舉人

官濟寧州學正善誘後進學者稱蕉雨先生又次傳訖
爲君季父君生而嚴重寡言五歲卽能書蕉雨先生授
以書家執筆法弱冠遂以善書名旣補博士弟子員充
同治癸酉選拔貢生 廷試未入選復舉光緒元年
制科試列二等以州判候銓居京師一日心動急請假
歸比至則母病已旬日人謂孝思所感用能親視含斂
母喪服闋乃遵父命改捐知縣分發河南戊子春到省
旋丁父憂十七年起復充河南讞局承審官勤於其職
有要人與貧民爭宅基函託當道思逞其欲君持平剖
決曰虐人媚人吾弗爲也案定遂辭讞局閒居久之會

陝州牧何君請君佐州治其屬邑有被控因公苛斂者
何君屬君按其事曰窮治之彼去吾當請若代君旣至
密訪得實乃痛懲邑紳與胥吏蒙蔽者而令得原他日
以語其家人曰陷人以利己吾豈可苟同哉二十一年
冬竟感疾卒於陝年甫五十有三君同祖兄弟九人胞
兄憲秋由舉人官江南知縣有治績從兄憲瑞由進士
厯官湖北知縣內升主事改官許州直隸州卒於官余
嘗銘其墓所謂循良呂公卽蕉雨先生子也君從子相
曾紹曾或爲令或爲州判皆能繼起有聲獨君以有用
之才而不竟其施嗚乎可惜也已君與余叔季兩弟鄉

貢同年又與余叔弟服官同省余與君交游日久故知君學行爲審君之卒也余未得其家人訃文今君之子惠曾以徐幼穉太守所爲傳狀屬余爲表墓之文余乃揭其大要如此是時君卒已十有六年余季弟歿已久余叔弟墓亦有宿草矣嗟夫人生離合聚散死生盛衰之際可勝道哉宣統二年庚戌冬十月表

趙君墓表

君諱猛字濟寬西華人趙氏在康熙時有以割股療親疾舉孝行者君其來孫也祖履吉武學生考素存太學生妣張氏君爲人狀貌雄偉身長六尺少讀書通大義

既而棄文習武弱冠入縣學嘉慶十三年丁父艱十六年連丁母艱既失怙恃又鮮兄弟時值河南大饑君與兩叔父析居僅有薄田六十畝乃痛自發憤舉嚮時馳馬試劍之好一切屏去不事而獨竭力於耕田常偕亞旅作坐出入晨而興至暮弗怠布衣麤食如常人晚年乃置田十餘頃所居曰趙灣村宅後有圃數畝種雜果樹數百本引河爲池以時灌漑又於圃內爲菴池每歲獲利甚豐由是邑中數殷實之家咸稱趙氏然君性豪落不拘小節以敦樸率下而尤篤於天倫事庶母如所生庶母有女適張氏家貧而早寡君迎養家中歲杪始

送歸新歲則復來以是得保貞守節五十餘年而後終
君卒於道光二十年十月七日享年五十有七娶謝氏
子三長錦堂早卒婦郭氏以節孝 旌次玉堂太學生
次華堂亦太學生女二孫六麟閣光緒元年 恩科武
舉鳳閣傑閣俱爲武學生尙賓廩生雲閣太學生曾孫
十人連璧武學生壯附學生嘗因淩君甲烺問學於余
乞余表其曾祖墓余謂君以孤露之餘服田力穡卒致
富厚而能以勤儉教家爲善於鄉里救災恤鄰敦宗睦
族可不謂豪傑之士與昔西漢晁錯論當世之務莫若
使民務農近世言利之臣乃欲首重商務至設爲商部

以籠天下之財使得如趙君者經營其間所施設必有
先後輕重矣會壯應優科試至省門索文甚急余姑以
是應之俾碣於墓亦欲使異時治國聞者有考焉光緒
三十二年秋撰

旌表節孝孫母李太宜人墓表

吾同姓在淄川者曰銘書生逾月而喪所怙零丁孤苦
母氏守節勵貞恩勤教育以迄於成立銘書以光緒元
年 恩科舉於鄉節母聞報至感而泣謂銘書曰吾辛
勤三十年乃幸有今日然汝祖父竟不及見也汝當益
自勉以力承先志耳越十五年己丑銘書用大挑一等

以知縣發河南母亦就養至大梁鄉人與銘書同官中
州者習知節母懿行乃合詞具事實由子弟光州牧叔
謙備文達諸巡撫使者聞於 朝旌表如例是歲光緒
二十五年也明年恭遇 覃恩銘書援例爲父母請
封贈母李氏得稱太宜人其冬銘書奉檄權知滎澤事
奉太宜人之官甫逾月太宜人遽以壽終明年春銘書
扶喪歸里以狀介于君仲范屬子爲誌幽之文子因循
未及爲而予叔弟以是冬病卒光州任所死喪憂患之
餘予益不能無戚戚其不復有意於營度爲文亦久矣
而銘書因子君催促至再至三會予叔弟之喪已除檢

尋原狀不可得乃據當日請旌事實敘次大略以歸之太宜人爲淄川諸生李蹊暖女生四歲而喪母自幼以賢孝閱讀書識道理孝經與列女傳皆能成誦年十九歸儒瀚爲繼室不及事姑翁鳳儀年老矣有風疾家事無鉅細悉委諸子婦家有薄田數十畝耕織所入以供甘旨佐先生修脯資儒瀚讀書攻苦得嘔血疾以縣試第一應學使者試不及試昇疾歸父驟聞宿病增劇遂不起儒瀚亦以毀卒遺言撫孤事重以宗祀爲託太宜人於時年二十有八耳宗族或利其孤弱肆欺凌忍弗與校值咸豐末捻寇入東境銘書隨母避亂鄰村屋

宇悉爲賊焚同治元年淄川賊起據邑城銘書復隨母
倉皇逃避三年中險阻備經矣賊平始歸課耕業讀家
室危而復安皆太宜人之教也始太宜人侍翁與夫疾
藥必親嘗嘗暮夜焚香告天願以身代旣而連遭大故
家無次丁抱嬰孩與一六歲弱女經營喪事典嫁衣備
歛具喪葬如禮往往淚漬衣衫成血痕見者咸爲感動
銘書稍長令從塾師讀夜歸必課所習背誦成熟始就
寢少廢學卽予杖繼又泣下不止銘書以是感奮發憤
於學太宜人守節至旌門時五十有四年矣享年八十
有二以卒嗟乎銘書之欲得子文者豈不以太宜人

節行爲可傳而必欲亟亟表章於後世與然予之文固未必足傳太宜人而太宜人之志行則旣上達於朝廷固宜載在國史以傳諸無窮又奚待於予言予爲表其大節如此銘書其勉之詩曰夙興夜寐無忝爾所生孔子引此以證士之孝而於大夫則以夙夜匪懈爲證故曰母取其愛而君取其敬夫忠與孝無二理亦猶節與孝兼全而後不媿爲完人士大夫遭時艱阨而不能以節義自立者其尙知所媿哉光緒二十九年春二月表

誥封安人夏母汪安人墓表

昔伊川程子作上谷郡君傳敘侯夫人懿行甚詳及朱子采入近思錄止載其訓子四五事然百世下無不知有程母者以有程子此文也予同年友夏君震武浙中大儒其名在天下矣其學術純正實得自母教爲多庚子之歲 皇帝奉 皇太后駐蹕西安震武奔赴 行在獻中興十六策並爭論和議不見納明年春乞假歸里道出汴梁與葆田相見於旅邸執手唏噓旣別去因寄所述先妣汪安人行略屬爲表墓之文蓋安人歿至是十有一年矣先是震武丁父憂奉安人命廬墓者三年其自墓歸而得依安人左右者僅二年而安人卒震

武痛甚復廬墓三年於是吾師嘉定徐侍郎哀其志爲
安人墓誌以爲震武早歲辭官閉門講學志高行潔皆
安人之教也葆田謹按狀稱安人父諱廷拭母王氏以
節孝旌故知書識大義安人生而有至性濡染母教六
歲聞兄讀書卽能暗誦數年盡通女誠女訓及孝經論
語孟子禮記內則列女傳諸書年十七歸夏封君事姑
鄭孺人曲意承歡非命之坐不敢坐非命之退不敢退
鄭孺人稱其孝及封君出嗣爲口父後安人則又以事
鄭孺人者事姑節孝倪孺人兩孺人之喪皆齊蔬蔬食
如禮旣免喪久矣語及猶涕洟不止其教人必曰此先

姑之言非我之言也生子女六人震武爲長男愛之甚
至自能言卽指令識壁間字能行卽率之詣大母前問
安坐立必教之使正急步疾呼則呵禁之稍長卽教以
古歌謠及孝經諸書故震武就塾時則四子書毛詩俱
已略上口矣其教他子女亦如是粵匪之亂安人攜子
女避亂山中諷誦自如一日封君自外至笑曰世亂如
此若母子尙有心讀書耶安人曰世雖亂書不可廢也
令兒曹稍知義理而死死亦無憾當是時親族就食者
日數十百人斗米直錢四千貲罄安人則盡斥衣飾簪
珥給之必俟諸親族食已然後食至或不得一飽亦不

自明也封君善治生安人食淡攻苦以佐之亂定後家業漸裕震武赴禮部試時安人出篋金二十命之曰此汝母十指所積者汝在途不得效世俗投試卷以乞於人也震武既成進士以病不與 殿試歸有擬薦爲書局總校者安人戒之曰吾與汝父幸不藉汝一錢之養汝不能杜門讀書乃欲以是爲利耶其後震武以庚辰補 朝考授主事分工部學習值俄羅斯構釁輒抗疏指斥柄臣疏上留中不報遂乞養歸又明年侍郎宗室公寶廷以典閩試還過浙訪震武山中侍郎其鄉試座主也安人謂震武曰汝師以抗直積忤當路而檢身不

密行且得罪去何況如汝汝非今日仕宦中人也休矣
又二年前當事者皆罷去親友皆勸震武出安人輒婉
謝之而自封君卒後家稍落安人獨持門戶者數年其
於喪葬嫁娶饋遺族黨禮接賓師以及周給捐助皆經
畫裕如未嘗匱乏然亦不蓄餘貲震武見安人劬勞閒
自陳不能祿養之罪安人曰汝今尙未知母心耶養親
以善不以祿吾豈不能爲尹母哉平時治家嚴肅閨門
內不聞嬉笑之聲室無纖塵箕帚盤盂皆有定所歲時
薦祭尤極恪誠嘗謂吾日日如遇除夕元旦夙夜兢兢
造次必敬其教諸子婦皆然震武述安人言行大略如

是又謂震武好詆人短安人教之曰人詆汝短於汝何如非惟傷德必且取怨震武好言廉安人曰人未有不儉而能廉者汝誠欲廉必自不妄用始然後能不苟取於人耳震武好以古義責人安人曰人豈得盡聖賢義理之極此乃士君子所宜自勉者豈可責人且強人以所必不能從乎嗚呼觀於安人之教子如是其視程母侯夫人何異哉宜其有子之賢亦不減明道伊川也而葆田先母于太恭人雖不讀書其教葆田兄弟乃亦與夏母略同然葆田曾不能立身行道揚名以顯親故承吾友之屬媿弗能執筆屬詞光陰忽忽已逾三年中聞

又迭更憂患顧瞻身世邈焉寡儔世變方興邪說滋橫
求如夏母汪太安人母子之篤信正道者蓋幾不可復
觀故獨表其嘉言懿行可爲百世法者以告天下後世
其他瑣事與生卒月日則有墓誌與行略而此不具著
云光緒三十年二月表

附致夏滌菴書

滌菴仁兄同年座右往歲承命爲先年伯母太安人
墓表今三年矣遲稽之罪非言能解去年春黃硯菴
孝廉公車回浙託帶一書並大箸元稿四冊想俱收
過光陰易得倏復周歲近日起居何似葆田遺家不

幸變故迭生去夏五月內前光州亡弟之長子爲季
弟後者以軟腳疾遽歿於汴寓河南學堂一席葆田
審知其不可久處先已告辭因於秋冬之際護喪歸
里家世零丁公私拮据亦擬自是不復出門矣冬間
忽又接汴帥書延主大梁書院講席以故鄉爲德人
偏處常恐室家不獲久安而又有衣食之累遂不免
倉猝應聘以今歲春仲攜孫兒輩到此輒復自悔平
生自命謂何今竟不能保其初志然觀天下大勢亦
幾於蹙蹙靡騁近又喪一子婦葆田方身自敦養兩
孫秋後仍須攜眷東歸不識此身尙能久存否前日

檢點未了事謹勉擬表墓文一篇大懼不足以副孝
思茲特錄稿寄呈伏乞鑒閱有未合即賜指正爲幸
旌表節孝土默特母葉太淑人墓表

清故旌表節孝葉太淑人 誥贈通議大夫口公之配
而今日講起居注官翰林院侍讀世榮之母也 國朝
令典命婦不以節旌門其有以節孝先旌者子貴則褒
贈有加焉所以教天下之爲婦爲子爲臣者至矣太淑
人系出葉氏父諱口戶部漢軍人生而端淑在父母家
則見稱於宗族戚黨旣歸則順於舅姑同治紀元贈公
于役奉天省垣邁時疾以歿太淑人時年未三十抱一

嬰兒僅三歲與六歲弱女上事俯畜恩勤撫育兒榮也
稍長教以讀書督課綦嚴榮既應童子試乃資教授以
謀甘旨母勤勞如故榮請母少休太淑人謂之曰人生
豈有不事事者汝既有志讀書亦宜刻苦自勵使異時
稍有成就勿徒爲衣食計是吾之志耳榮好聚書太淑
人每詢其所購已盡讀未訓之曰吾聞讀書若耕田勤
乃有獲置田而不耕安用田爲又曰汝外祖子姪八九
人皆延名師教之而竟無一人成名者汝苟不知自勵
他時問耕稼則不知學商賈則不能吾亦抱恨於無窮
矣榮奉命惟謹光緒十二年太淑人守節逾二十五年

矣鄉人公舉節孝有司以聞得 旨旌表如例而榮適
於是歲成博士弟子明年應鄉試入都太淑人偶患舊
疾復作榮歸見其形容憔悴問所苦曰無他行愈矣而
適會所撫六歲女旣長適田氏以是年冬十二月喪其
婿太淑人感傷疾日增明年十二月二十八日卒遺命
勿延僧道作佛事先是同治末東方盜賊頻起或勸太
淑人攜家屬出避太淑人謝之曰生死命也避將焉往
其後竟亦無他他日榮請曰當爾時母獨不懼何也太
淑人曰自汝父歿吾欲殉之久矣脫有變故有死而已
何懼之有嗚呼太淑人臨難不避而卒之大節克完以

視士大夫遭時艱危不能主憂臣辱主辱臣死之義者
其孰爲得失哉太淑人卒後五年子榮連舉成進士入
詞林數逢 恩詔疊膺 誥命之贈天之所以報節母
者亦可謂有加無已矣自宋儒謂餓死事小數百年來
窮鄉僻壤婦人女子皆知節義爲重而近世邪說滋興
口謂三綱爲漢儒所造新說彼不知君臣父子夫婦之
義又安知中國不可一日無人倫也與故予表葉太淑
人於世君所述細行無事複舉獨載其遺教可爲當世
法者因附著此義以明 國家風教之盛婦人守節者
生旣顯膺 旌表歿亦榮獲褒贈仁至義盡於以立爲

婦爲子爲臣之大防實可爲萬世標準云光緒三十一年夏六月表

旌表節孝張母陳太夫人墓表

濟南太守張君學華述其先妣陳太夫人之節行將使葆田爲表墓之文乃再拜言曰某不幸五歲而孤吾母陳太夫人艱苦守節以養以教黽勉搢持者三十餘年使吾家詩書之澤賴以不墜有司旣以節孝表其門闔某備官詞林入諫垣逢 國大慶得 誥封吾母爲太宜人累 封太恭人比年再遇 覃恩援例加級 晉贈一品夫人而墓石未立大懼懿行不傳於後世敢請

子爲文如歐陽公之表曾公夫人黃太君則幸甚葆田
拜而受之曰有是哉太守之達於禮也攷 本朝令典
命婦不以節旌門所以教士大夫家守禮明讓故張皋
文編修旣入翰林亟呈牒禮部爲母請旌門之典然後
復呈牒吏部請 錫封母太孺人如禮憚子居用是誌
姜太孺人墓以爲皋文不沒其親之善可謂能事其親
者矣今觀太守君所述何其與姜太孺人事先後略同
與況其懿行尤有可傳者與按狀太夫人番禺陳氏父
其銘官四川鹽源令卒於官太夫人時年幼侍母歸粵
年十九歸 誥贈榮祿大夫張府君樸臣公爲繼室贈

公元配太夫人姊也以產難卒贈公不欲再娶曰如繼聘非賢若前夫人者不可語聞於外姑以太夫人歸焉結褵三日值英人入廣東城踉蹌出奔東潯鄉數月始歸是歲咸豐八年也時君姑陳太夫人猶在堂年七十餘矣贈公兄弟三人伯早世仲嘗遠遊贈公館穀所入以贍一家猶不足太夫人無私財無德色娣姒之間怡怡如也贈公中年患肝氣多病善怒太夫人時逢譙讓則卑拙順受營治醫藥殫憂極瘁晝夜罔懈旣遭贈公之喪年二十有九有子三人長者年甫九歲次八歲最幼卽太守君也太夫人悲痛之餘念君姑已篤老朝夕

在視必躬必誠如是者又四年姑沒葬祭悉依於禮又以兄公之喪久未葬謀於母兄弟卜地窆焉始贈公客瑞文莊公墓歿後文莊公集同官賻助得數百金太夫人悉舉以償宿逋曰無爲異日子孫累也生平自奉儉約至於延師課子饌食必豐腆師或偶出則親自督課尤喜誦左氏傳及國朝人詩古文詞少時所誦書史輒能強記不忘及太守君兄弟漸長經營亦益勞家計日絀而口不言貧其待人必盡禮事寡嫂如姑嫜從子無依者恆周恤之有姊適張氏早死無子爲營窀穸且命子孫春秋必祭其墓贈公先世本居鎮江墳墓咸在

歲時嘗丐族人代祭書或不達及太守君官京師有同族居鎮江者以時通訊歲祀始得無缺太夫人聞而色喜手書諄問以爲常其家居遇祭日雖病猶拜跪如禮亦以是教其子孫光緒丙申嘗一就養長君增城官解太守君旣成進士由翰林改御史在京日多太夫人每以書慰問旬日必一至間歲思相見然以期望厚未嘗促使歸也庚子秋變起京師南北路梗太夫人憂慮特甚明年太守君乞假歸省太夫人遽以是冬十一月二十四日卒年六十有三卽葬於廣州大東門外銀院嶺虎爪岡太守君所述如此易稱坤道无成而代有終太

夫人可謂不媿矣抑葆田竊觀張皋文先妣事略姜太孺人年十九而歸張府君二十九而寡居其年與陳太夫人同姜太孺人事姑得其歡於先後委宛備至於三黨親戚吉凶遺問之禮未嘗闕於鄰里之窮乏來告者未嘗不依恤也其媿行又與陳太夫人同而憚子居獨敘張皋文爲母請旌事今余則敘述太夫人懿行特詳者蓋以明孝子有善必稱之心又欲使凡爲女士者取法焉太守又言曰以吾母之慈善遭遇之不幸艱苦堅忍曾不獲上壽之報卽爲子者求一日之養志而不可得也嗚呼斯言也有不聞之而感泣者哉宣統元年

己酉冬十一月表

徐母王安人墓表

徐鴻臚宗勉之母王安人以宣統二年三月十一日壽終春秋七十有六先一日宗勉以遊學至沛南得急報馳歸旣成歛痛不欲生乃以書謂其友人趙文運曰先母以月初二日爲戰氏妹奉迎至城內不孝日再往省旣出門之日告別先母猶面訂歸期何圖於次日暴疾昇歸遂不起不孝之罪非止在此一遊矣痛念先母孝慈勤儉佐先君起家艱難中撫不孝四十八年不孝乃不能慎終於一日謹於苦次成雜憶數條儻蒙當代大

人先生哀其愚昧爲先母賜撰傳誌以光泉壤則宗勉死且不忘趙君以書示葆田乞爲立傳葆田謹按所述安人幼聰敏父曰口煜母李氏年二十四歸徐府君生子女五人成立者三治家井井有法聞兒輩得賢師友則大喜處娣姊厚以和視諸子猶子徐府君嘗三散千金與宗人親族無力養生送死者皆賴其力安人實佐成之始時家甚貧夫婦同心拮据經營二十載家漸裕暮年商業折閱府君卒人言頗嘖嘖安人曰此非婦人所與聞也命其子與諸子四分田產各守其一遇先人祭日祭品必親治自四世以下湯飯匕箸以百數一一

檢視周詳亦以是爲子孫教次子宗摛早亡女適戰氏者又寡撫孤弱尤恩勤此其大略也徐府君諱守諒生平慷慨好施歿而鄉里私謚曰端惠以子宗勉舉鴻臚寺序班遇覃恩加級敕封承德郎宗勉嘗輯刻當代諸公所贈詩文曰闡幽錄以傳於世安人受封敕文有相厥夫子皆曰善人之褒可謂榮矣宗勉好學篤行其赴沛南亦奉母命而行乃事出不虞竟不獲於母歿之日親視含斂其與趙君書云宗勉歸時第見吾母尸臥在牀有目不能視兒有口不能呼兒有手不能撫摩兒矣痛哉痛哉葆田爲掇述一二俾揭於墓庶觀

者有所勸感則安人亦可以不朽嗚呼世之爲人子欲
表揚其親者可以鑒矣

石河鹽場大使會稽石府君墓碑

國朝令典有大慶必推恩臣下襲及所生光緒三
十年皇太后七旬萬壽天子大孝錫類有詔京
外官各加一級越明年開封府知府石君庚以河防敘
勞由三品銜特用道員晉階二品於是追贈祖考如其
級旣乃敘述先公世系行誼宦績以示其友孫葆田曰
先府君捐館舍四十有一年矣不肖之孤敬守遺訓不
敢以不義自汙今且忝竊非分每念先人宏才碩學官

終下僚大懼有善弗稱無以信今傳後謹述崖略願有
道君子錫之文俾揭諸原上則幸甚其世系曰府君諱
某字某世爲浙江諸暨望族祖諱某始遷居會稽遂著
籍焉父某贈文林郎今贈榮祿大夫母某太夫人生府
君兄弟幾人府君其季也其行誼曰府君幼孤性穎異
讀書輒過目不忘年弱冠出遊悉推產與伯兄及兄嫂
相繼卒復收育其孤人以是稱其孝友嘗館亳州茅氏
家前後幾二十年賓主相得甚以氣節文章相勵也咸
豐初粵匪陷亳州茅氏壯者皆宦遊惟餘老弱在室府
君預令徙他所而身獨代爲居守賊至跳而免無何捻

匪張洛刑等突入州郭脅富室出貲犒其黨並劫府君
往見呵嚇百端府君不爲動曰茅氏藏鏹固多然非己
物今日之來我有死而已不知其他賊黨怒將脅以兵
其酋遽止之曰石先生長者不可辱遂送府君出茅氏
卒不失一金由是義聲聞遠近亳州人士雖素號善戰
者無不聽命焉一日偵知賊將逼城在某廟會食府君
函致各團乘其不備掩擊之賊眾悉殲無一得脫者其
宦績曰府君屢試京兆不遇以膽錄議敘鹽大使分發
山東初署蒲臺批驗所大使有富商某依勢違法運同
某君莫能問府君廉得其實曰姦商敢爾呼其人至將

子杖叩頭乞免仍繫以歸運同某君語人曰石君居恆如老儒臨事乃凌厲若此吾彼時猶凜凜焉自是諸商皆懾服旋補膠州石河場大使石河缺瘠甚府君屏除陋規舉室啖麩糲至幾不能舉火冬夏據一几臨書或與朋友談文日夜孳孳無倦容竈丁或逋賦召而諭之未嘗加朴責久之皆爭先輸納無負者同治四年捻匪東竄膠州牧陳君夙知府君有濟變才城守事悉就諮訪賊亦知有備而去府君未嘗乘肩輿百姓見其至輒起敬曰此前此未有之清官也是年夏偶患熱證至五月六日竟以不起年甫五十鄉民間耗走哭者日千百

人大使鹽官實不理民事其得人心如此是時各官廉俸皆不給鹽運使某公聞府君身後事狀曰奈何使廉吏無買棺資乎爲請於巡撫使發俸銀如常例置始得歸葬異鄉開封君所述事實如此葆田竊攷同治初巡撫山東使者爲朝邑閻文介公其知石府君固宜而膠州牧陳君卽吾師宜賓陳先生蓋嘗稱石府君爲人子子不阿其擘畫時事多奇中然談於名利故官終不達至善處骨肉與誠待朋友尤爲人所難能云娶徐夫人有賢行稱同志後府君十七年卒合葬於濟南之錦繡川子一卽庚光緒五年舉人以大挑官河南知縣卓著

循聲洊擢今職前後巡撫皆薦其賢昔宋歐陽文忠公
有言爲善無不報而遲速有時惟石府君積德累仁而
享年不永志不獲伸於生前今開封君所守實歐陽公
昔年臨治之邦吾知其仰承先志必有如瀧岡阡表所
云而晚節克全則所以報 朝廷之恩遇者當更有在
不且足以表見於後世而庇賴其子孫也哉爲之銘曰
信足以交友而仁先及於親義足以動眾而勇亦庇其
身知足以決事而誠尤孚乎民位雖不稱其德而食報
在子孫氣佳哉山川明秀是爲 大清廉吏會稽石府
君之墓門後有過者請視此文

范縣學訓導崔予思先生墓碑

先生諱贊襄世爲壽光縣崔家莊人予思其字也世以耕讀爲業父諱寶臣太學生課農暇則課先生讀業日以精從父椅園先生邑名孝廉學有淵源制義外兼攻古文詞先生從之遊最久得其指授卽以其所學者教諸人由優行廩膳生員同治九年庚午舉於鄉與予爲同年生甲戌考取臚錄以知縣用未就光緒庚辰大挑二等授教職嘗一署榮成教諭未久卽去旣去而人思之不置又歷署城武日照縣學訓導濮州學正所至雖攝篆數月必以敦勵品行爲諸生勸最後補范縣學訓

導范屬曹郡風尙勇悍橫經之士舊染習俗先生司鐸
十餘年諄諄告誠力挽頽風由是文教大興有武生某
設錢肆存先生修脯錢數百千又書吏某冒支先生廉
俸延不繳先生悉一笑置之爲人謙和抑然善下人無
論卑幼與之言藹如也嘗進及門訓之曰教人以身不
以言吾之所以教汝者皆吾所得於先師也光緒二十
八年四月十八日卒於范縣學署年六十有八其子某
以仲冬扶喪歸里范縣諸生相與立石講堂以紀先生
教思始先生居鄉時足不履城市賢令聞風景慕舉爲
鄉飲大賓先生辭謝不遑及卒後其門人采眾議私諡

曰文恪又以先生女夫王蘭芬所述事狀寄汴介予同年長兄王友農屬予爲外碑之文會予亡弟長子以疾歿於汴寓予以是遲遲不果爲而友農促至再三予家世居榮成先生爲教諭時予方奔走京外不及見先生今先生卒已年餘矣回思同舉諸君亦大半零落其客遊僅存者獨予與友農數人耳予何敢以不文辭按狀稱先生六七歲時卽能恪遵庭訓母沈太孺人卒哀泣若成人見者皆以孝稱弟贊周爲從叔父後早卒無子先生爲經理其家使孀婦無匱乏虞其篤行如此予敘先生事蓋尤不能無媿於中嗟乎世豈有無本之學問

哉今世邪說流行舉不知禮義不識倫常之異域相與
師習其技藝文字而自以爲新學如先生之以身爲教
蓋不可多得矣予故附著此義亦冀鄉之人有所感奮
焉

同知銜湯陰縣知縣王君墓碑銘

君諱珠裕字還浦章正王氏先世由直隸遷至山東明
天啟中由章正硯池山再徙埠村世業農 國初有諱
守京者以拾金不昧有司旌其門曰善人君之十一世
祖也其後有顯宗者始業儒於君爲八世伯祖又數傳
至君之考諱永康始發憤爲學家貧從朋友借書讀之

既成秀才食廩餼貢成均執經授書者甚眾君幼秉庭訓年弱冠補縣學生父命肄業灤源書院從匡鶴泉先生遊爲同輩所共推服同治九年庚午舉優貢尋領鄉薦是歲並補行六年丁卯鄉試王氏一姓得舉者二十有八人君其一也明年會試不第又明年丁母憂服闋設館省門從遊之士多所成就前翰林院編修吳煦庭其尤著也光緒六年會試復報罷君至是五上春官矣同年友有勸君考試膳錄者遂由國史館議敘以知縣選用復因襄治河工敘勞保本班儘先選用君因赴都候銓座主嘉定徐侍郎知君學行薦君主張家口掄

才書院講席生徒悅服當是時中東戰事起安侍御維峻以建言獲譴發張家口軍臺君獨迎致館中每篝鐙夜談相對欬獻及再至京師嘗爲人稱道安君雖權貴聞之不避也將去卽請安君代主講席謂諸生曰安公眞汝師矣旣抵任所仍不時遣人餽贐安君以是得稍安先是君嘗主講萊蕪書院遊其門者率掇科第今禮部主事張梅亭尤爲君所特賞予與君爲鄉舉同年及君謁選得湯陰予適在叔弟祥符縣署君每事必諮而後行有宓子賤兄事友事之義其後子叔弟升任光州值渦陽匪亂亟治團練從君借巨款君立應不少吝也

湯陰爲燕趙南北通衢君始至訪有盜魁某密捕置諸
法由是境內安堵又倡修邑中書院捐助生徒膏火遇
訟事無大小必親詳鞫吏役莫敢侵犯期年後有議頌
君德政者君諭其人曰吾居官但求上不負 國下不
虧民足矣若何用此虛文爲君爲人勤儉廉明每戒子
弟以勿染官場習曰官非可常作也君俸祿所入悉以
分潤親族其行義皆此類在任僅兩年以積勞致疾己
亥春予過湯陰時君已乞休相見握手敘語幾莫能相
識予心憂之比予至光州未幾聞君卒矣光緒二十五
年四月五日也喪歸士民奠祭者填街塞巷下及乞丐

咸相弔泣曰天何奪我賢父母之速也蓋予得諸湯陰
人所述如此君生於道光二十三年六月二十五日享
年五十有七祖考皆贈如君官妣皆贈恭人配于恭人
先君七年卒始君年三十五無子立弟之子翰爲嗣旣
而側室生子翀君卒時年甫週歲卽以其年十月葬君
於村南新阡于恭人祔又三年壬寅子翰中鄉試爲補
行庚子辛丑 恩正併科舉人明年春應會試至大梁
見葆田而泣曰先大夫葬時銘幽之文未具今願得先
生文以傳不朽予諾之而未及卽爲蓋是時予叔弟歿
亦逾歲矣追憶昔時同遊濟南忽忽便近四十年文章

節義如君其存者無幾能勿悲哉及是翰又書來催索
乃爲銘曰

古昔有言學優而仕後代反是善政靡紀觥觥我友奮
興濟南學有原本不爲空談發爲文章可歌可詠蚤登
賢書晚乃從政兩載賢勞未竟厥施萬民尸祝有口如
碑最君生平世儒誰伍學士春風蒼生霖雨立身行道
是謂揚名仁及三族家餘一經有子克紹科第縣縣善
人有後遐邇稱焉我作此銘匪云諛墓用示來世學者

景慕

廬州府知府循良李公碑銘

公諱某字秋槎河南懷慶府河內人也以諸生從戎積
績官至廬州府知府 欽加鹽運使銜光緒四年奉調
辦皖南善後保甲事宜以勞致疾卒於旅次於是兩江
總督據實入奏 諭曰已故廬州府知府李口歷著政
聲遺愛在民著將事蹟宣付史館立傳以彰循績欽此
按古今禮制官至三品者得立石墓道東南公雖官終
知府而名列 國史又嘗恭遇 覃恩得加級封贈先
代皆從二品公兄子今萊州太守與葆田舊習因以碑
銘之文見屬葆田嘗權知合肥爲廬州附郭邑距公卒
時十年矣而輿情愛戴猶如公在任之日其深得民心

如此昔子產治鄭以惠稱而其遺言謂火烈民望而畏之故鮮死焉公爲政尙嚴猛而所至稱治蓋深得子產之意宜其遺愛在人與公始爲曾文正公所知條陳軍事輒見采納亳州有蠹役密通捻匪公設計誘擒之一州皆驚旣乃大服又周巡各堡諭以大義賊至無援乃大懼遁去文正稱其有保全地方功乃奏請免補同知以知府仍留安徽補用同治六年代理蒙城縣事招徠流亾撫戢散勇事事有方巡撫使英果敏公奏稱其潔己愛民爲皖省賢員第一有勉爲循良之 褒尋奉

旨補授廬州府知府實由曾文正英果敏二公合疏密

薦蓋 特恩也十一年權知潁州府次年莅廬州任廬
州自咸同以來將帥雲興號稱繁劇公以清廉自矢吏
畏民懷其治蹟具詳 國史葆田嘗聞其軼事云合肥
有大俠鄭戍爲害地方前吏莫敢問公一日侵晨獨騎
出叩其門卽擒以歸遂伏誅一郡震慄在任四年以母
憂歸明年爲沈文肅公奏調至皖南最公宦績在皖北
郡縣爲多而始以收復黟縣羊棧嶺獲保復隨同官軍
圍攻赤岡嶺大捷保至府同知又從曾文正公久故皖
南人亦服其威教云公幼隨父遊京師能通蒙古語同
治初嘗一應鄉試不中其智略蓋得自天性然早傳庭

誥與兄友愛尤篤既官知府乃以本身及妻室應得封典馳封兄嫂又與兄先後告終故河內人稱其孝友而循吏之名幾與李文清比隆可不謂賢與銘曰

昌黎有言上古愛民爲官求人當時任者苟可以任位加其身卓哉李公遇知大賢奮迹戎幕既有武功復著循績勳庸昭灼累荷宸褒名垂國史治蹟畢張所居民安所去民思允稱循良施設未竟身終皖南愛留皖北我作斯銘上追昔賢下告無極

宋君墓碣

君諱世範字子防又字星垣世居汜水段家坊父處士

君諱茂源著有愚狂祕集若干卷家貧惟閉戶讀書以理學傳其家嘗病世人之習爲巧僞也因自號守拙君生而豪爽少長爲文不拘繩尺處士君以先儒靜坐法教之曰先收其放心然後可以讀書明理也君由是絕意進取日讀宋五子書及元明人語錄一一體會於心遭父喪哀毀盡禮事母尤能先志承歡母偶忿怒不食必長跪自責母顏霽而後起治家有法禁師巫入門婦女無燒香出外者晚年以醫術濟人鄉里皆化其善行以光緒四年三月三日卒年僅五十有五娶徐氏溫恭淑慎與君德相媿子某今有文孫恪臣舉於鄉以知縣

候選遇 覃恩追贈君爲文林郎徐氏 封孺人後君
二十年而卒卜以今年十二月庚申合葬於祖塋先是
恪臣嘗以其曾祖愚狂祕集屬爲序余以愚狂乃孔子
所謂斯民之疾而處士君乃獨不以自諱其祕密實非
外人所能窺及是又請余誌其祖墓會余亦將歸里乃
據恪臣所述撮其大要俾揭諸墓道昔韓昌黎之銘李
習之祖墓曰蘊必發其起必大翱爲其孫有道而甚文
固於是乎在嗚乎吾於君亦云

韓府君墓碣

韓君聚齋述其先府君行略求余爲表墓之文其詞曰

府君諱錦城字華亭又號雅齋先世世居武安父諱某
母某氏府君同母兄弟九人女弟一人幼時家貧習爲
賈託迹大梁省垣以忠信見孚於人與士大夫交在闔
閩尤能關心國事民瘼中年家業漸裕處兄弟最友愛
居鄉黨喜爲人排難解紛鄰鄉有事亦罔不盡心力而
爲之嘗整定社規數年內一鄉無訟事晚乃以商業授
人而自退處閭閻以善行化導後進援例得翰林院待
詔職並欽加五品銜爲父母請 封贈光緒三年中州
大祿縣令延請散振救飢民府君獨秉公無私並自設
粥廠所活甚眾十二年河決鄭州府君首捐米數千石

以拯諸流離因而頌聲徧於大河南北仕宦中多有知其
其人者以二十五年九月十九日終於家年七十娶霍
氏先卒子二人長卽聚齋五品銜候選縣丞 賞戴藍
翎次融齋亦藍翎五品銜江蘇候補縣丞補缺後以知
縣用孫八人曾孫五人其繁衍尙不止於是孫葆田曰
俗之媮久矣余讀王介甫征君墓表所稱淮之南有善
士杜君隱於醫徐君隱於筮知市廛中固不乏善士特
世人未之識耳余於同治中嘗因閩西峰太守得一識
君今幾四十年矣近日 朝廷亟行新政特立商部使
盡得如君者爲之任事其庶幾有濟哉故余於君子之

請誼不能卻因附著此義俾異時有攷云

太學生趙君墓碣

光緒丁未秋七月朔日吾友張次陶先生卒其門人淄川孫迺瑤新城趙筠昌等皆來會葬至濰余始因韓生晉昌以識孫趙二生皆從張先生遊爲宋儒之學者也旣而孫生以其外大父趙府君行略示余乞爲表墓之文其言曰迺瑤自得張先生爲依歸年來又移館外家得親侍外大父杖履日近典型今浹月之間溘焉俱逝小子將何所賴矣語次輒歔歔不止棹田不忍拒也接狀君諱開運字子元先世益都縣人明萬厯間始徙居

新城之張店鎮君祖父以上皆能以勤儉治其家家頗
殷實父諱顯名以輕財好義稱於鄉母孟氏生子三君
其長也幼失學晚歲得呂近谿小兒語張楊園訓子書
深嗜而篤好之尤慕忠孝節義事每舉昔人嘉言懿行
爲家人輩津津樂道之一生孝友睦婣拯危濟急蓋出
於天性父年八十餘猶健在君所以奉養服勞者無不
至同堂兄弟姊妹十餘人耕讀婚嫁事皆君一身任之
而於財物一無所私咸豐辛酉南匪東犯君預購一地
名金屯率眾盡室避亂其中得免於難人人咸服其智
方是時鄉里辦團練輒擅殺戮或私相報復君獨多所

匡救寇亂後歲游饑家遂中落然君利濟之心不少怠
遇儒生有學者待之彌恭自新學興卽謂其孫筠昌
曰居今當閉戶讀書勿圖進取可也庚子京師之變君
聞之至爲流涕者累日泊 兩宮迴鑾而後喜可知也
嘗訓子孫曰世以災難爲劫數吾謂人但當存好心蓋
孝弟之家天必佑之昔江州陳氏浦州鄭氏皆經大亂
而家無恙爾曹勉之君以嘉慶二十二年十二月生至
今歲丁未年九十有一矣先是新城縣學公舉君爲鄉
飲大賓丙午壽登九秩鄰邑進祝詞者無算及得疾自
知不起猶諄諄以孝友勤儉訓子孫戚友聞其卒咸出

涕曰老成人亡矣配朱氏有賢行卒於光緒十五年子男三榮炳篤志正學先君卒張先生實誌其墓榮燦爲叔父後早歿婦李氏以節孝著榮焯太學生筠昌其子也女二長適孫氏卽迺瑤之母撫孤守節三十餘年迺瑤有弟曰迺琨尤嗜洛閩之學嘗徒步赴關中從賀瑞甫先生遊歸而謗訕大興君獨深喜之次女許字長山李氏未嫁而夫亡自縊以殉士大夫爲詩弔輓淄川鄒太史振岳哀爲一集曰憫烈蓋君之化行於家者又如是孫五人曾孫十五人卽以其年某月日葬於張店鎮之西北新阡嗚呼君雖終身不出鄉里然可謂善人矣

迺瑤又述君於辛酉歲避寇難與鄉里壯健者五六人
猝遇賊騎四合同行者皆失色君曰勿畏率眾依林薄
各持鳥銃自衛大呼殺賊賊氣懾解圍去然則君智勇
又有過人者惜乎其不克見施也余嘗見吾友張先生
所爲君九十壽序頗心儀其爲人茲得迺瑤所述事略
爲撮其言行可傳者如此俾鄉之人聞而知所勸焉君
亦可以不朽矣

王節母桑孺人墓碣

節母桑氏壽光人國學生錦園長女年十九歸同邑國
學生王建三次子蘭圃甫三歲而蘭圃卒無子桑孺人

幾不欲生先是國學君卒遺命蘭圃與兄異居其兄蘭馨痛弟早逝乃以次子晉源爲之後而又不欲以仰事累孀孤且慮母氏之心戚也獨奉養母氏蘇太孺人於家孺人乃力請曰子事母職也婦事姑如子事母禮也未亡人所以不卽死者以姑在耳有姑而不得事何以生爲於是蘭馨從其志使與蘇太孺人同室而居曲盡孝道以養以敬蘇太孺人若忘其次子之弗在者蘭馨亦能助成其孝蘇太孺人卒時年八十有二矣晉源旣長孺人教之有方又躬撫孫曾以至於成立孫曾多嫻武略精騎射當咸豐庚申寇亂及山東漸近壽光孺人

謂晉源曰亂端如是盍毀家紓桑梓難乎晉源從其教約鄉里築砦堡廣置器械寇至不敢犯鄉人賴以保全者甚眾明年孺人卒守節五十餘年年七十二是歲咸豐十一年也又八年巡撫丁公命有司采訪節孝以孺人事上 聞奉 旨旌表入祀節孝祠並給銀建坊如例逾年同治庚午歲孺人之曾孫翰清中武科舉人 系曰孺人之夫之族弟友農與葆田爲鄉舉同年嘗稱孺人節行謂非獨貞也其賢智有足稱焉予謂 國家設旌表以勵風俗節烈同歸一祠皆所以全其孝也如桑孺人者其事乃今世男子所不易及茲可謂坤道无

成而代有終矣非純節者與友農屬予爲文以傳孺人
子觀尹編修所爲行實引節母張夫人事稱壽光俗尙
禮誼故婦女亦多以壺德顯孺人境夷而志苦故予爲
掇其言行可傳者一二亦庶幾不歿其實云

張烈婦碑文

烈婦賈氏淄川人縣學生賈緒庚女生而靜正知大義
年十八歸新城儒童張士茂夫年甫十三鄉俗家無餘
丁者往往娶長婦爲持門戶計婦則恪執婦道侍巾櫛
閨門內外無間言越三載值歸寧一日感噩夢知不祥
旣而聞夫病辭其父母曰婿病愈誠幸否則兒不得事

親矣母知其志乃令其叔母與偕行士茂果以疾卒婦欲死者數輒爲家人解救兩家父母因相約於士茂葬畢迎婦歸母家使人勸慰婦曰勿過慮此非我死所也乃爲其夫作生時衣履眾莫喻其意踰旬際祭期求歸奠夫墓父母以風雪嚴寒不欲其往則泣曰兒死且不避敢避寒乎及歸祭夫畢禮拜舅姑託言身憊入私室須臾投繯死矣距夫士茂卒僅月有二日時光緒三十三年十二月十六日也一時哭弔者不絕於門於是兩縣紳士候選教諭胡錫昌王濂佩及廩生胡慶蘭增生國樹棠附生孫迺珠等爲具牒公懇旌表以彰風化

而孫迺瑤復爲烈婦行實以求余文將刻諸石嗚呼節
義之重於世久矣如烈婦者可不謂從容就義者哉余
聞婦母胡氏亦士族婦生長儒家故習知禮訓方夫歿
時其殉夫之志已定特牽於父母私恩故隱忍以待其
叔父嘗爲誦列女傳貞節事烈婦聞之曰貞與烈一也
人但求無媿所生爾其誓心如此卒能不欺其志嗚呼
烈矣

李吉侯墓誌銘

吉侯諱豐綸姓李氏世爲萊州掖縣人曾大父諱瑛篤
學而能文仕至廣西右江兵備道大父諱瞻聖歲貢生

父諱圖嘉慶癸酉科選拔貢生以文學世其家有聲齊魯聞學者稱少白先生咸豐初嘗爲直隸無極縣知縣吉侯初生以周易筮之其卦遇屯曰吉其象爲雷雨爲經綸其辭曰勿用有攸往利建侯故吉侯生而名之曰豐綸十歲徧讀十三經不煩提誨卓然自立無極君旣病瘳去官僑居濰縣吉侯侍醫藥十餘年無倦容獨以其閒益治學問習爲古文詞及無極君卒吉侯以哀毀成疾又累遭寇亂家事日益替矣其嗜學乃愈勤所居在濰縣西南十里有屋數楹別構一室曰西園吉侯日與其甥柯劭懃劭忒稽經講藝於此質疑辨難以爲樂

視人世豐約之境一不足以動其心劬忝余同年友也
余嘗以事至濰過所謂西園者時吉侯方挾其室赴河
南禹州未嘗一相見又明年同治癸酉聞吉侯以國子
監生舉順天試有名矣甲戌春乃相遇京邸因得盡窺
其蘊吉侯治經尤長三禮及左氏春秋其意以爲三禮
者先王經世之大法春秋者先聖馭世之大權其言曰
左氏傳五十三例乃魯史舊例非孔子筆削之例也凡
經文不合於例者皆聖人特筆擬著一書曰春秋辨例
由傳書以求聖人之筆削又嘗謂治經不可不明地理
因據國語水經注證葵丘之會在晉地非宋地也蓋其

自得於中者如此與人交無貴賤皆得歡心終日溫溫不聞有臧否其赴河南也以妻父蓬萊宮君知禹州招之往居禹州凡幾載稍稍從宮君習爲制舉文旣一應禮部試不得意仍返河南至新鄭縣車行山溝中道狹遇雨水驟至不得出竟與僕夫俱死焉是歲六月某日也始吉侯出都門與其甥柯劭忞乘一車至新鄭前一日語劭忞曰吾夜夢緋衣人閉目而揖我何也旣而劭忞遇救得甦乃追占其夢曰水爲妃妃象陰閉目者死也神告之矣吉侯卒時年三十有五耳再娶皆無子元配宮氏禹州君女繼娶蔡氏江南上元人當是時吉侯

有生母王孺人與蔡氏並寓禹州聞耗乃幾絕嗚呼吉
侯天旣賦其才與學而不使其永年有母而不得其養
有室而不得其歸天果以是安施耶於是劭恣旣致其
喪乃謀立其從孫紹曾爲後以卒之某月日返葬於濰
縣之某鄉某原以元配宮氏耐劭恣以狀抵京師謂葆
田曰願有銘銘曰

嗟惟吉侯志高意狷何行之修而運之蹇天壽非命窮
達非天斯人而死其誰信然

張君墓誌銘

君諱琳字笠生姓張氏先世籍江南金壇自君四世祖

遷居常州曾祖思安祖南珩皆以君貴 贈通奉大夫
考文金國子監生咸豐庚申常州城陷殉焉 賜卹入
祀忠義祠 贈資政大夫妣費氏 封夫人生子五君
爲長生有異稟讀書輒心悟家貧棄學從外嫗張蘭洲
大令遊大令官山左事事諮而後行官事悉賴以辦治
因納貲爲君得從九品非所好也旣而佐盧君曉亭幕
厯單縣及濟寧州任皆得其力當是時粵寇謀北犯山
東羣盜起相應君爲盧君畫守禦嘗以鄉兵破賊數千
賊卒不敢越境而東會 忠親王僧格林沁帥大兵駐
濟寧召盧君主饗精王所率皆禁旅暨蒙古驍騎山川

要隘夙所未經倉卒或致敗衄乃益召募勇丁時戶部饋餼不能時至王躊躇無計君因建言河南商工九縣爲東省運鹽口岸屬因賊氛商旅不通課引多虛額願假糧臺本銀二萬兩召商經理歲得三四萬金助軍糈於計誠便王韙其言遂奏請官行運鹽以君總司售銷山東南運局自是興矣君旣感王知遇則益爲定法制立條約俾私販者斂跡民亦無所疑前後助軍餼十五萬王欲以君能入奏君力辭同治四年王遇難曹州君乃辭謝鹽務退居濟寧濟寧人思王恩德議爲祠以祀會有旨詔王立功地皆建專祠君乃集商紳議相地

施工爲祠堂三十餘楹旣成曰吾有以報王矣初君以幕遊少有所蓄閒歸迎父母父母意皆不欲東庚申之難君仲弟韓奉費太夫人先期出避季弟臻侍父居城陷皆遇害君初未得耗旣乃痛絕卒閒關迎費太夫人至濟寧又十餘年而壽終然君終以早歲飢驅不得孝養爲終身恨云君爲人端凝嚴重無疾言遽色待人尤寬厚遇友朋貧窶傾囊助無少吝陽湖湯君爲官山左負券數千金後因事罷職君悉還其劑無所責生平重然諾急人之急見義必爲晚歲居濟上戚友待以舉火者恆十餘家光緒八年九月二十三日卒春秋七十有

五始用籌饗勞議敘道員例授中憲大夫以子恩釗官
工部員外郎加七級 誥封資政大夫配奈氏同郡人
在母家以孝聞始處艱窘佐夫理業奉祖舅姑甘旨未
嘗缺性節儉雖履豐不改其素先君卒于一卽恩釗工
部都水司候補員外郎以君卒之次年八月朔日從君
志葬君與奈夫人於濟寧城北新阡恩釗好古而能文
與吾友孔編修以魯昆季善編修手君行狀屬爲銘銘

曰

生雖不達旣彰厥施商工九邑眾口莫訾苟利於人勇
身以爲川高流水其澤無涯有子與孫善承先教厥聲

不匱曰仁曰孝任城故墟實藏遺貌我銘其幽用觀來效

宛平陳公墓誌銘

光緒九年河水再溢山東歷城齊東利津等縣積災民至四十餘萬當事承 詔振撫晝夜徬徨富家大姓往往出貲財佐有司濟艱阨於是宛平陳公散家財數萬所全活飢民無算其年冬十一月壬午公遽以疾卒於濟南館舍士大夫相與弔於其廬鄉民弔者日數百人焚香泣拜及其殯也家祭巷哭道路填塞觀者歎惜出涕以爲厚德感人若此盛矣哉近代所未嘗有也公諱

恩壽字伯平先世本浙江山陰人自公之考資政公諱顯彝始寄籍宛平由州佐起家仕至山東候補道員歿卽葬於歷城之東吾故友王芷庭編修嘗銘其幽曰資政陳公者也公旣承資政世德及子冕以是年成進士廷試 賜第一人及第遂世爲宛平著姓公之歿也

冕以翰林院修撰假歸省侍不及一月遂於苦次述公行誼政績泣求葆田爲誌墓之文葆田嘗游公父子閒蓋知公爲最審云公始以入貲爲鹽場大使用軍功游保知縣嘗知萊陽調補恩縣又調署長清所至有惠政及民旣去而人思之不忘官萊陽興修盧鄉書院人習

絃歌至今弗替公性警敏年十八佐父資政公守館陶
出奇計扞賊於時尤號爲知兵當咸豐辛酉捻匪任柱
等竄山東漸近萊陽公率鄉兵禦於小姑河得賊謀三
人釋不誅曰俾知我有備則不敢復窺我境及賊擾蓬
萊福山公慮鄉兵弱且未諳紀律儻賊復來則我腹背
受敵乃練精兵數千自率以行而設伏山谷俟賊至絕
其歸路大破之公又目覩鄰邑流亡諸民心傷之乃捐
俸金千兩並議發常平倉以振不待報輒行人食其利
棲霞民于岸因避難與人相攻鬪聚眾逼城下官莫能
治以叛聞大府檄公往公至諭以禍福卽時解散一邑

安堵事聞大府滋以公爲能且知其才足應緩急也將
去萊陽士民攀轅臥轍不得行凡四日乃出境恩縣捕
役田文升大猾也黨羽數百人散處東阿齊河各邑前
官噤莫敢發公設機擒治鄰境以安擒匪宋景詩出沒
東昌公百計抗禦修築城池恩縣無事調長清未久而
有肥城黃崖山之變黃崖山距長清縣境四十里揚州
人張積中因山爲寨以邪術惑眾與鹽梟擒匪通蹤跡
詭祕或告積中謀爲亂巡撫朝邑閣公檄公與肥城令
陰察之公以書諭其黨積中得書答詞甚謾次日公率
二役往甫登山聞礮聲從役已一斃公所乘馬亦傷遂

馳歸越日而闔公統兵至以書招積中出積中拒命會
是時告變者日紛闔公怒揮兵進勦公流涕謂闔公曰
張逆謀亂罪當誅其脅從者無罪前日誤斃勇丁耳請
分別治之勿玉石俱焚闔公領其言翌日申令曰圍破
但戮男丁勿及婦孺亂民不戰而潰積中闔室自焚是
役也從張逆死者且數百人亂既定公與登州府太守
豫公分救婦孺四百餘人皆資之歸里公既痛死者之
罹凶慘官吏不能爲先幾安撫也遂自是隱有歸田志
明年丁卯上書告疾又明年隨肅毅伯李公平賊河北
由同知直隸州知州保俟補缺後以知府用並加四品

銜 賞戴花翎會丁母邵夫人憂服除改東河同知又
改歸河南候補知府皆未赴時資政公寓濟寧公雖一
歲數省弗安也資政公晚歲喜交游尤樂施與公稟前
型孳孳弗怠及資政公棄世公遂退居厯下不復有意
仕進矣爲人謙和遇橫逆弗與校其教子必以孝弟忠
信子冕登上第人皆爲公賀公以書諭冕曰始吾慮汝
不能承家今且懼汝不能報 國汝其勛之嗚呼此可
以見公之志矣初公爲令多異政宰長清有村民控王
某毆斃其弟棄屍滅迹株連多人王某已誣服矣公察
其枉請重訊羈禁王某盡釋餘眾村民欲上控公弗爲

動未幾而其弟果歸人益驚爲神明其治獄類此者甚
眾葆田往因吾友王芷庭與公相識其後數以文字相
往來芷庭故公萊陽所得士也及今歲葆田改官知縣
方欲就公攷問設施之略而公亡矣悲夫公生於道光
十七年十一月十三日卒年四十有七娶齊氏某人女
子二長齡宛平縣學廩生先公卒無嗣次卽冕乙亥恩
科舉人癸未會試一甲第一名進士將以十年□月□
日葬公於資政公墓次葆田謹依修撰君所述爲公墓
誌如右復爲銘曰

陰功之說儒者弗稱爲善獲報古有明徵揭揭陳公不

終厥仕濟物厚施以貽孫子始公就學才實逾人投筆而歎奮迹從軍中歷三邑人稱循吏要公所藏百僅一試河流爲患溢我洙東萬眾待哺胡失我公公之惠心感孚老幼萬口一聲仁人有後其死孔哀其名彌昌嗚呼我公死而不亡

桐城方先生墓誌銘

先生諱宗誠字存之先世由婺源遷桐城爲魯祺方氏與雍正乾隆朝名臣望谿宗伯苞恪敏公觀承別爲一宗及先生與族兄儀衛先生承其世德益振厥緒扶樹道教爲儒林宗仰天下學者翕然同聲名蓋與宗伯相

埒始先生從里人許玉峰遊得聞大道既乃師事儀衛
先生又得六安吳竹如侍郎與曾文正公講習扶持之
而正學以明其仕嘗爲縣令矣然當時識與不識咸稱
曰方先生光緒十三年冬安徽學使侍郎貴恆公以先
生正學純行奏於 朝得 旨賞給五品卿銜時先生
已被疾聞 命感激涕零明年春二月癸卯遽以疾卒
於懷寧寓邸春秋七十有一逾旬部牒至而先生不及
見矣其孤守彝等守遺命不爲行述既逾小祥乃偕先
生門人陳澹然爲事略四卷刊行於世又屬葆田爲誌
銘之文曰銘將納諸墓欲得學行仕止如先人者爲之

詞庶幾信而有徵嗚呼葆田於先生無能窺其萬一顧
嘗辱先生折行輩與交今先生既沒敢弗撮舉懿行以
備異世采擇先生少時家貧事父贈朝議公有至性贈
公卒家有五喪未葬先生徒步求葬地義不應科舉遭
粵寇之亂避賊山中營相堂以居不廢講誦友人罹賊
難者皆爲營葬或撫其遺孤嘗著俟命錄以究天時人
事致亂之由與士大夫行己立身弭變之方時吳侍郎
官山東布政使得先生書因致書先生請至使署與講
習討論大學士文端公倭仁時爲師傅嘗摘其語以進
經筵曾文正公之規復安慶也見先生所論攻守方略

以書幣聘先生先生謝不往旋遊大梁客巡撫使嚴公
幕爲嚴公草薦舉賢才疏皆一時正人爲當世傳誦同
治改元安慶克復先生感曾文正公知己誼遂應其聘
其後文正公由兩江總督移節直隸遂以人才奏調疏
稱方某熟於宋五子書素講愛民之術先生作書辭謝
今方伯貴筮黃公力勸其行先生旣入官存心利濟任
棗強十年勗立敬義書院祀漢儒董仲舒又嘗釐正祀
典勸建義倉皆他人視爲迂濶先生獨力行不怠值歲
饑上書大府請蠲本邑百姓及鄰邑錢糧所全活億萬
人光緒八年引疾歸里當事延主講席皆不就生平著

述無虛日於近世和合漢宋及專主漢學之說皆嘗辨
其誤所著經說曰讀易筆記二卷書傳補義三卷詩傳
補義三卷禮記集說補義一卷春秋正誼四卷春秋集
義十二卷孝經章義一卷讀學庸筆記二卷讀論孟筆
記五卷柏堂讀書筆記十三卷志學錄八卷續錄三卷
周子通書講義一卷文集曰柏堂前編十四卷次編十
三卷續編二十二卷後編二十二卷外編十二卷所編
校之書曰陸象山集節要五卷年譜一卷春秋經世錄
十卷文廟從祀賢儒言行錄三十卷桐城文錄兩江忠
義錄各數十卷在官治蹟則有宦游隨筆棗強縣志補

正諸書皆刊行於世其他撰著尙十數種其學術之正大近代所未有也先生爲學大旨在內外交修體用兼備所爲謀議有關於理亂興衰之故者甚眾及其行誼治績先生門人陳澹然所爲事實考略備矣先生貌和而氣溫見人一善必稱之嘗尙論先儒陳良見稱於孟子與楚人屈原開忠義之先皆宜從祀孔子廟庭又謂國朝大儒如張楊園亦宜從祀厥後浙江巡撫楊公以楊園從祀入奏得旨允行其議自先生發也曾文正公嘗自指其胸以示客曰朋輩中此中最好者莫如方君吳侍郎稱先生爲好賢若渴取善不遺葆田以甲

申春始見先生於懷寧先生命季子獻彝從予遊予深
媿不敏嗚呼先生歿而正學遂不可復聞矣初先生四
世祖孟曖性超邁嗜讀書有子曰澤得宗老閑阿之傳
姚郎中鼐實從學集文所稱待廬先生也及曾孫東樹
學宗宋儒晚而自號儀衛澤弟源實爲先生曾祖考諱
松行誼載安徽通志 贈朝議大夫妣金恭人生子二
先生其長也元配甘氏繼娶蘇氏均 封宜人四子培
濬有文行早卒次守彝太常寺博士培凝殤獻彝府學
生一女適同里孫仲平孫五人以某年某月日葬先生
於某鄉某原銘曰

黃舒之間奇傑所產儒釋代興嘗載前簡爰及先生爲
世儒宗載道以言荷之以躬在咸同世干戈俶擾湘鄉
武功方召克紹迺有先生三聘始應以道治民何任弗
勝政成而退出處自如卒荷 天褒矜式鄉閭最厥生
平實惟正學明體達用是爲先覺我銘其幽伊公匪私
嗚呼先生一世之師

柯封翁墓誌銘

封翁諱蘅字佩韋姓柯氏膠州人今安徽卽用知縣劭
愨之父翰林院編修劭愨之本生父而子季弟咸之婦
翁也子季弟居父母憂以哀毀卒其婦悲傷喪目翁爲

求良醫針治罔效光緒十五年葆田自皖歸其年冬翁命子偕行送節婦至京師翁將就養編修邸中是歲恭逢覃恩編修爲翁請誥封如禮翁見之色喜比葆田歸濟南甫六日而遽聞封翁之訃翁以十二月二十一日卒矣傷哉明年春喪過濟南葆田迎弔編修以銘幽之文屬葆田追念往事每一執筆輒心傷復止以至於今四年矣會歲暮予以事至濰得宋庶常晉之所爲柯先生行狀乃敘次其實而系以銘封翁先世浙江人元江西儒學提舉兼奎章閣監書博士九思其遠祖也明末有諱忠卿者避浙難徙居山東膠州是爲柯氏始

遷祖數傳至封翁世以詩書爲業祖諱某 誥贈奉政
大夫考諱某嘉慶戊寅科舉人官福建甌寧知縣歷任
某縣有惠政蚤歲遊京師以博聞稱與掖縣李少伯圖
爲金石交又與安工劉莊年耀椿諸城李月汀璋煜號
山左四名家吾鄉所謂柯易堂先生也妣張氏生子三
人翁爲季幼隨父闔中閒從陳恭甫編修遊又嘗受詩
文法於蕭遠村方彥聞兩先生李少伯先生愛其詩妻
以女嘗稱曰柯甥五字詩可謂五言長城其所作浸浸
入杜陵之室昔所稱何李弗逮也當是時封翁依李先
生寓厯下兩應秋闈試不得意遂棄去專爲詩古文會

塵攜童自隨布履麤服見者不知爲封翁也翁爲人落
落寡合生平於非義之財一介不取遇尋常人不妄交
一語有所不當意輒去之葆田始以同治癸酉春見翁
於河南鹿邑署其主人則瑞君徵故甌寧君弟子也是
年夏翁送女至湖北興國州時先人署興國州牧公事
暇輒與翁飲酒論詩又追敘少年時事及故鄉風土景
物及濟南明湖水木明瑟之狀輒爲悵然者久之葆田
兄弟日侍側竊聞其緒言故知翁家世爲獨詳配李太
宜人亦因送女與吾母于太恭人意合遂留居焉封翁
於是獨返河南其後三年至 今上光緒元年冬先人

卒於武昌寓邸翁以明年五月赴弔遂盡室返濰縣葆
田兄弟旣扶喪歸里行至濰吾母倉卒患痢遽歿於旅
次又明年而予季弟以哀毀亡矣又二年而李太宜人
亦卒翁遂獨居十有一年種竹蒔花以爲樂嗟乎死生
盛衰之感至翁與予所遇可謂奇變百出者矣此予之
所爲每一執筆輒心傷而復止也翁生於嘉慶某年月
日享年六十有九所著有聲詩闡微杜詩七言拗律譜
春雨草堂詩集晚年因教子爲樸學尤專心於攷證嘗
爲漢書七表校補取國朝諸通儒說晨夕鈎稽方己丑
北上時暫駐濟南猶假予所藏錢竹汀廿二史攷異于

自鈔錄歎其精審卒之前一日尙呼編修告以學無止境餘如說文次第攷所著皆未就配李太宜人著有錡齋日記又校文選李注其詩集二卷郭靖侯嘗取與封翁草堂集合刊以行世子二長劭愨光緒己丑進士次劭恂出爲伯父後光緒丙戌進士現官翰林院編修女二長適濰蔣經郭以節孝 旌次適子亡弟季咸也銘

曰

西望浮陰東濰泚中有佳城鬱以峙是爲封翁之幽宮
世世子孫受嘉祉

前河南巡撫李公墓志銘

光緒十五年八月乙酉前河南巡撫歷城李公以疾卒於里第春秋七十有九距公去河南時十有三年矣始公由翰林起家奉 旨會辦山東團練事以功授山西大同府知府未期年量移蒲州同治初元粵匪竄關中回民相繼爲亂公調集兵勇與賊夾河而戰賊屢犯屢卻全境獲安守蒲十年中遭太夫人戚大府飛章密奏 詔以金革之事無避公不得已以墨經從戎同治七年擢河東道遷按察使督河防如故明年晉布政使公 迺籲請補行守制有 詔給假百日起復後入都 陛

見 恩賞優渥光緒元年奉 命巡撫河南秋九月入

覲既莅任二年事關吏治民生罔弗殫心籌畫值丁
丑歲大饑疏請帑銀十萬兩截留漕米五萬石以救災
黎無何以同官誥誤部議鐫級而公遂引疾歸矣公諱
慶翱字公度一字小湘曾祖溥祖德懋父廷芳乾隆己
酉拔貢庚戌 聖駕東巡 召試二等甲寅 恩科鄉
試舉人歷任廣東澄海英德陽江新寧南海江蘇靖江
吳江直隸香河等縣知縣有惠政三世皆以公貴 贈
榮祿大夫妣皆一品夫人公鄉舉時本名縉咸豐二年
因夢徵遂易今名是年成進士改庶吉士明年散館授
編修當是時粵匪李開方等竄山東蹂躪臨清高唐

朝命近臣回籍會辦團防公偕給事中後任兩廣總督
毛公嚴條約明訓練扼險要賊不敢逼事平公遂出守
大同其移守蒲州也地據關河爲秦晉豫咽喉地所謂
河東天下之要會也自古蒲阪有失秦晉皆岌岌不能
保公於是聯民團分布河干賊不得踰當是時秦豫邊
民皆視蒲境爲樂土百姓扶老攜幼集河孺者廬至會
防軍慮賊奪舟舟盡艤北岸民立夾灘中北向呼號公
命舟迎渡或持不可公排眾議盡渡之百姓歡聲若雷
呼青天活我旣而調防滎河燕晉中州之民在秦謀生
者聚對岸以數千計載糧亦數百車公復命舟渡之曰

弗渡是齎盜糧也渡四日乃盡賊至無所掠而去方寇
急時張太夫人在署或請避太夫人曰我去而民益驚
乃爲長孫誨吉完婚民心以靜公事親孝值烽燧告警
太夫人適寢疾公欲留侍湯藥太夫人諭曰若勿以私
廢公竭忠報國吾心安吾目瞑矣公旣奉命奪情
兵民見公咸感奮不三日而營壘成賊偵知乃大驚故
終公守任百姓安堵及擢河東道釐剔鹺務積弊商民
尤以爲便官按察使內而清理庶獄外而整飭戎行無
不措施裕如公夙具知人識所簡拔如廣西巡撫高公
崇基馬公丕瑤湖南按察使沈公晉祥皆公官布政使

所深激賞者也當關隴多事饜需浩繁公先事籌濟轉輸不絕軍威以振則其功尤在當時云公之去河南也以地方報災事遲與布政使同時被議河南民俗號純夏州縣不肖者遇平歲相率爲欺蔽以災歉上聞而實則預徵民賦爲官吏侵用名曰存庫布政使劉公齊銜悉其弊深惡之光緒三年歲饑州縣有報災者劉公徃於往事輒予駁斥而是時河南北實大災民不聊生於是中州人官京朝者連章入告劉公遂得罪旋以病卒公亦被議降三級調用公既解組歸優游林下值黃河爲災又連年歉收前後巡撫使遇有疑難事常過公咨

訪公知無不言然未嘗一言及於私性喜吟詠詩成輒棄去與人談雜詼諧聽者娓娓忘倦及容接後輩則循循然以禮法公娶朱夫人側室蔡宜人王安人子四福沂江蘇常熟縣知縣福瀚光緒己卯科舉人河南候補知府福灃皆前卒福涑二品廕生濟南府學廩生女子四一適直隸曲周縣知縣金紹先一適 記名御史翰林院檢討趙汝臣餘皆未適而亡孫葆年崧年鵬年將以光緒七年某月日葬公於歷城城東茂陵山之麓其孤福涑以狀來乞銘銘曰

公以文興而多武功嬰城卻寇惟孝惟忠遂躋顯仕作

鎮土中厥施未竟道有汗隆東山不起愴悲無窮銘以昭之奠此幽宮

翰林院修撰陳君墓誌銘

君諱冕字冠生先世本浙江山陰人君祖父資政公諱顯彝實始寄籍宛平歿而葬於厯城城東君考中憲公諱恩壽厯官山東長清萊陽恩縣皆有政績予嘗志其墓所謂宛平陳公也配齊恭人生君昆弟二人長曰齡有宿疾早卒君年十五入宛平學十七歲舉光緒元年乙亥恩科順天鄉試文名噪甚又八年遂以進士第一人及第是歲光緒癸未河決山東桃園災民四十餘

萬中憲公急散家財佐有司濟困阨以勞瘁致疾君得
書乞假歸中憲公勉以毋負科名繼成厥志旋遭中憲
公大故哀毀逾恆人喪葬悉遵禮制次年河水再溢君
捐鉅貲挈戚友乘舟散餅餌復擇高原築室千楹以庇
流氓服闋入都已丑 恩科典試湖南得人稱盛壬辰
丁母憂奉喪返濟南明年五月之浙修祖阡八月旋京
師遽以疾隕於寓邸年甫三十有五君自幼從吾故友
王芷庭編修學當同治九年山東開庚午科並補行丁
卯科鄉試芷庭爲舉首予偕諸同年至君塾中君時偕
其兄揖座客年猶未及舞勺耳英多之姿已見於眉睫

聞及君成進士芷庭已前卒三年矣中憲公不幸亦於是歲卒其後君每見予輒太息於人生之多故而師友聚散之可感者恆多也君慕義勇爲居儔人中策事勢可否成敗侃侃獨執己見不隨眾爲唯諾生平周人之急不少緩其居家不問有無遇親友之孤貧者存恤尤加厚聞山西大祿捐千金振之又作書募人濟振得萬餘金其任事慷慨多類此始中憲公以利濟存心君承其訓益孜孜不怠人謂君聲華早耀不久且大顯乃竟溘然以逝豈所謂爲善者必獲報固有時而不驗耶嗚呼可悲也已君卒於光緒十九年八月十七日娶張氏

繼娶廖氏又繼娶李氏側室郭氏子四洪蕃洪晟洪守
洪愿明年正月十九日卜葬於歷城縣丁家莊祖阡張
恭人廖恭人塋銘曰

豐其遇嗇其年才高乎今世而志不獲伸於生前誰實
爲之彼蒼者天吁嗟乎仁不獲報庶幾哉後嗣多賢

安正馬府君墓誌銘

安正馬梅生編修將葬其封翁中憲府君於祖塋之次
而以所撰事狀授葆田使爲之銘葆田敬受不敢辭蓋
編修與吾家論交三世矣咸豐中先人宦遊湖北時編
修祖父通奉公實官湖北布政使先人蓋嘗爲其屬僚

及子季弟與編修爲選拔同年同治甲戌子嘗因編修
拜封翁於京邸封翁爲子言侍通奉公湖北時也今二
十有四年矣編修始用 廷試一等爲工部七品官俸
滿遷主事以 今上大婚禮成加四品銜遇 覃恩父
母皆得 褒封其後編修旣成進士改官翰林封翁則
前已受 封階至中憲大夫故其卒也喪儀悉用正四
品禮也而葆田自得見封翁後不二年遽遭先人之喪
是後變故相仍歲月蹉跎以至於今今子季亡且二十
年中閒子又嘗奔走江淮不獲與編修相見者屢矣而
不意及是子遂銘封翁中憲君也其可感也與按狀中

憲君諱雲達字漸九一字鴻洲曾祖諱中愷青州府學生祖諱北超國子監生皆 贈通奉大夫考諱秀儒道光十五年進士官至湖北布政使 誥授通奉大夫妣王氏李氏皆 封夫人君兄弟三人伯曰雲路嘗爲館陶縣教諭後殉捻匪之難 贈國子監助教與君同出李夫人季曰雲翔通奉公側室出也君於昆季友愛無閒事父母能孝謹六歲就傅嗜讀不倦塾師異焉年未冠已博通羣籍願以隨通奉公宦遊之越之蜀不得歸應郡縣試乃入貲爲國子監生屢應鄉試未售咸豐五年應試順天選取謄錄君自是遂絕意名場乃援例爲

中書科中書其秋通奉公適擢湖北布政使當是時武昌漢陽皆爲粵匪踞官軍以次進攻未克通奉公乃就襄陽開藩而命家人悉由閒道歸里君念通奉公左右需人遂獨攜子往侍子卽編修時僅十齡通奉公慮兵單饑絀日夜憂勞得君贊畫裨助爲多會逆賊朱中立倡亂襲陷樊城進攻襄陽君隨通奉公登陴固守閒出私金募壯士縋城出擊賊多所斬獲會援兵亦至圍遂解方圍急時編修適得危疾君一不遑顧有弁兵謀爲賊應君微聞知乃密白通奉公使移駐城外卒破其謀以守城功保儘先選用府同知使相官文恭公巡撫胡

文忠公並知君能明年武漢旣復二公檄君襄辦糧臺
九江之捷以在軍尤爲出力奏請 賞戴花翎又明年
而通奉公因失跌致傷遂告歸君於其閒侍醫藥服勤
尤至十一年春捻匪擾山東東方郡縣率舉辦團練安
正城惡不可守君本居城外乃奉通奉公攜家移城東
賈閣莊擇險築堡爲守工未竣而賊麴至君戒眾勿譁
賊疑有備不敢逼初入堡時李夫人猶獨留莊內君與
伯兄教諭君縋而出將迎李夫人中途遇賊脅索金帛
教諭君性方嚴義不爲屈君說賊使釋兄去給之曰盜
從我赴堡外索諸賊使數人偕至堡外君出不意躍入

濠內守堡者發礮石擊賊賊退君竟冒險迎母李夫人入堡越日賊乘雨夜襲堡教諭君適當其衝大呼奮擊君及諸守者聞聲趨救賊受創遁而教諭君倉猝被傷旋卒其子某亦及於難君痛哭誓眾眾皆感奮堡賴以完是時依堡避難者數千人皆德君君逆料賊將復至乃啟通奉公約四鄉各築堡砦百餘里閒桴鼓相聞村堡亦隱然巨鎮矣是年秋賊果大至君率眾守禦賊數往來迄不得逞比賊退返故居則室家蕩然君於此時尤竭力支拄同治元年李夫人卒四年通奉公捐賓客君既迭遭大故毀瘠愈甚服闋或勸之仕君曰余性拙

易忤俗幸承先人業得安居教子孫讀書毋墜家聲足
矣嘗謂編修曰吾棄帖括早願兒曹努力以酬汝祖父
未酬之志當光緒己丑編修應禮部試君適攜仲子至
都聞捷喜甚既聞季弟卒於里乃驚痛深悔此行立趨
駕南歸或勸少留不可及甲午復入都適編修奉命
典試甘肅君諭之曰汝困棘闈久今幸持文柄國家
求賢慎勿忘平時辛苦嗚呼卽此而君之所養與其
教於家者可知矣君爲人遇事通敏家居常避遠權勢
至事關義舉則怨勞有所不辭人尤以爲難云方君以
甲午冬歸自都中值遼事方棘輒形憤悒嘗寓書編修

謂爾食祿宜致身報 國母以家事爲念和議已成乙
未冬編修始乞假歸省而君竟以次年春棄養編修親
視含歛茲又可謂死生無憾也已君生於道光元年九
月十八日卒於光緒二十二年二月六日春秋七十有
六所著有寄興草晚香隨筆各二卷配李恭人子男四
長卽編修名步元同治十二年拔貢光緒十一年舉人
十五年進士次調鼎附貢生候選州判居憂以毀卒次
調玉縣學廩生次步墀女二壻諸城王陞第同邑鞠華
塋並候選訓導孫男四曾孫一編修述封翁懿行甚詳
予謹撮其大要如此銘曰

馬之始祖厥號四公當明初葉實隱於農六世而昌明
經作宰惠留稷山祠祀于載煌煌方伯益彰厥施經常
濟變在所無訾有子克家雖賢不仕耻美前人詒謀孫
子亦遭多難克顯其親庇躬以智得眾以仁最厥生平
教忠教孝來者多才式觀後效詩書之澤所貽孔多我
銘其幽刊石不磨

許州直隸州知州呂君墓誌銘

君諱憲瑞字芝巖又字輯堂萊蕪呂氏其先世多隱德
以樸謹稱於鄉至君之考前沛寧州學正諱傳誥以學
行啟誘後進一門羣從並登科第予嘗表其墓所謂呂

府君也君濡染家學又嘗師事同邑潘子駿太史所學益純咸豐九年與從父兄憲和同舉於鄉同治元年成進士以知縣分發湖北初署黃陂補授江陵調署東湖皆湖北名邑也所在有聲旋調漢陽移署蘄州最後調任黃岡在官十餘年勤心民事未嘗挂吏議江陵故有龍山書院廢弛已久君捐廉俸倡復之又築江隄數萬丈工成而民不知勞獲教民名冊曰此愚民被人誤耳焚其籍所坐止數人民以不擾漢陽自西洋通商後華夷雜處地號難治君遇事一處以至公商民帖服大府列君績以卓異薦任黃岡時已升補隨州而以父憂去

官始君迎養濟寧府君至官府君至不卽入署乃乘舟之江邊與村氓語偶詢及縣令皆曰吾邑有好官府君喜乃馳入謂君曰汝能得民心勝百牢養我矣旣又連丁母憂服闋謁選得河南登封縣時值大饑君先發倉穀又多方以振之民幸免流亡大府賢其能調滑縣未久會吏部推升主事入 覲授禮部精膳司主事京察二等截取直隸州知州分發河南尋補許州以十六年正月到官復膺卓薦入 覲奉旨回任前後六年吏畏民懷先時徵漕期迫民或典鬻以輸君獨改緩且定爲章又罷去議漕宴費民大稱便君律身嚴雖在官久被

服不異儒素其再至許州也常思保全晚節及光緒丁酉聞葆田至祥符寄書曰吾近多疾病極思田里子知我者爲吾表先人以光前德吾行將守先志終老蕉雨山舍矣葆田復書曰謹如教是年夏四月也及葆田歸山東未幾則聞君以七月戊戌卒矣春秋六十有五元配張淑人有賢行側室江宜人皆前卒子相曾同知銜候選知縣女二長適博山縣候選縣丞錢奉敏次適東河候補通判李雲第將葬相曾以狀來乞爲銘葆田始拜君於先人漢陽縣署時君攝黃陂事其後不復見越二十道光緒癸未君由河南滑縣入爲主事乃相遇於

都門適祿田由刑部改選知縣實與君同時赴內閣驗
看至今又十有六年矣君宦績可稱者多相曾所述或
略予亦僅撮其大要至其他懿行如立義塾修義倉皆
所謂能承先志者又已附見於呂府君墓表故不復贅
云銘曰

吾聞君嘗有言取多不如用少律已常若繩人故其在
官有善政其施治也無怨民嗚呼循吏不世見又況乎
冰心如月熱念皆春用能終始一節復何媿乎愛人利
物之謂仁後有考世德者是爲 大清循良呂許州之
墳

翰林院檢討王君墓誌銘

吾友翰林院檢討王君以光緒二十三年二月甲戌卒於京邸年五十有三子常師幼其家人既扶喪歸黃縣是年夏秋閒祿田再至京師晤君宗人廉生祭酒詢君所著詩文祭酒因述君遺言屬予爲銘幽之文會子聞兒子涕南噩耗遂倉猝歸里至冬君之兒子常益以書來告曰葬有期矣問其月日則正子兄子封窆時也嗚呼予尙能銘吾友哉及今年春常益始以予門人孫丕承所爲行狀寄予濰縣予乃爲櫟括其詞曰君諱守訓字仲彝又字松溪先世系出太原明永樂閒由直隸長

蘆遷居山東黃縣至君四世祖諱克預以舉人官福建
侯官等縣知縣有惠政其後遂益顯君大父諱允中嘉
慶二十二年進士官至湖南按察使署布政使入祀鄉
賢祠父諱棠道光十一年舉人官陝西雒南縣知縣母
慕氏生君雒南署中幼有異秉性穎悟湖南公絕愛憐
之長而沈酣經籍所聚書多至六七十萬卷慕鄉先達
郝戶部蘭皋之學生平著述無虛日始君與予同舉同
治九年並補行六年鄉試君願中副榜乃遵父命援例
爲中書舍人直內閣在公無廢事每一念親輒乞假歸
省常依戀不忍離及兩遭父母喪皆不得視含歛終身

以爲大痛其前丁父憂也蓋已以省親請開中書缺歸侍矣未及里而雒南府君已棄養比服闋再入中書遂以乙酉丙戌聯捷成進士改翰林院庶吉士是時慕太宜人已年屆八旬君歸而稱觴於里中鄉曲以爲榮比散館授檢討又嘗一乞假歸省至次年冬丁母憂而君又馳歸不及見矣此其所爲抱終身之痛也君於兄弟又能怡怡相友愛雖嘗析居皆終其身無閒言入翰林僅五年歷充 國史館協修 武英殿纂修嘗主講瀛洲書院教諸生有經法所著述曰詩毛傳補證適齋經說讀禮日記春秋地理補考習言考義稱謂雜考韻字

折衷漢碑異文錄王氏水源錄文學天性齋詩文集繩
牀百詠金波詞登州詩話其尤關一郡文獻者曰登州
雜事凡成書三十卷未卒前一日猶以搜采未盡將有
冀於後之君子爲言君之卒也廉生祭酒哭而挽之有
曰文學爲士鄉三百年之冠識者以爲知言 今上光
緒初君猶困鄉試時官內閣子與廉生與君幾無一日
不相見見則稽經誼史各舉所得以爲樂其後予連遭
多故奔走四方忽忽已二十餘年廉生旣入翰林文日
益有聲而君獨遲久而後發故所學亦益進蓋至其鄉
會連舉時而君少年豪華之習亦旣洗除殆盡矣君元

娶丁宜人戶部郎中丁樹馨女母家素豐能以孝敬得
姑與娣姒歡嘗質金釧以佐君購書籍早卒繼娶李宜
人前陝西鹽法道李楹女子一常師也其葬以卒之年
十一月辛丑墓在城東義樂逢家村西南三百步銘曰
有木於此堅且質其根不傷乃再實偉歟王君多才術
胸羅列宿手不律箸述等身志則侈天不與年嗟已矣
陽秋有作稱信史藏諸名山曰有俟吁嗟如君乃弗死
河南候補同知臺君墓誌銘

君諱柏紱字繡麟一字綬卿諸城人先世由江南霍正
遷山東所居曰臺家大村明世有存道者舉乙科官至

南陽知府厥後皆以詩書爲世業君幼承家學讀書能刻苦自勵尤慨然有志於功名嘗一應鄉試不得意乃援例入郎署嗣因父母春秋高不忍遠離遂乞養歸歸則日侍父縱游名山大川於諸城所謂琅邪九仙者無一時不往嘗旬月忘歸及父母有疾藥必嘗而後進遭喪能盡禮人尤以爲難能服除改同知分發河南受知於六安涂公嘗奉委解陝州急振星夜馳往偕地方官散放不濫不遺活飢民無算又嘗司辦粥廠兼散棉衣皆躬歷街巷視其極寒苦者周卹之或勸以節勞弗顧也在讞局遇有疑獄必加矜愼嘗奉文提光州巨案其

人以重金求緩峻拒之其自守如此然性喜施與平生
救困扶危未嘗於人有德色嘗假歸遇里中有義舉無
不樂爲光緒二十三年春權汝寧通判其地界連湖北
俗號難治君勤於其職吏畏民懷廉俸外不名一錢去
後汝南人立碑以頌其德葆田始與君相遇在己丑庚
寅閒時值黃河漫溢君由豫轉餉至山東祁寒暑雨飛
輓如期張勒果公屢稱其賢勞十九年近畿大水君慨
捐巨款以救災黎大府列章上請得 旨優敘加知府
銜 賞戴花翎明年遇 覃恩由本官加五級三代皆
得二品 封典曾祖景參本生曾祖景奎並 馳贈通

奉大夫曾祖妣李氏萬氏本生曾祖妣王氏劉氏並

馳贈夫人祖鏃縣學生 誥贈奉政大夫 晉贈通奉

大夫祖妣王氏 誥贈宜人 晉贈夫人父衡汾附貢

生 誥封朝議大夫 晉贈通奉大夫妣孫氏 誥封

恭人 晉贈夫人蓋於是而君仕宦之志少遂矣自汝

寧謝事後又嘗充丁酉河南鄉試文闈總巡尤爲監臨

所倚重不幸以是冬邁疾卒年甫五十有二今歲戊戌

春葆田由濰城南歸墓歸中途遇君之喪自大梁返里

就道左拜奠爲之一哀而出涕其孤子詒等因以銘幽

之文爲屬及是子詒以狀來告曰葬有日矣予乃撮其

大略而系以銘君生於道光二十六年閏五月十日卒於光緒二十三年十二月十五日娶劉氏子三昌熾長蘆試用鹽巡檢子詒縣學生昌燿太學生女二皆適士族孫男田其葬以十月口日墓在城北五里鳳林原銘曰

仕雖不顯遺愛在人南陽而後實始有君厥施未竟社流子孫用告來世請視此文

田封君墓誌銘

光緒壬寅春予護叔弟之喪自河南至濰於時田教諭智檢方居母憂與予居相近一日薄暮衰麻而入叩於

堂下予亟扶以入則又泣拜曰先府君之沒今一紀矣嚮吾得侍先生每思丐一言以傳不朽而問狀於吾母輒嗚咽不能成聲今吾母又長逝敢舉平昔所聞知者泣血述之願先生並賜之誌且銘焉越日又因其表弟高春暉以狀至而予哀戚在心多事卒卒未暇也既而予返至河南逾月又得智檢書曰吾母葬有日矣先生無忘前諾則感且不朽予乃發其狀而讀之曰嗚乎君可謂信能承先以啟後者矣按狀君諱某字仲民一字警侯濰縣學增生父諱口咸豐五年舉人青城縣學訓導 馳贈朝議大夫母翟氏 馳贈恭人田氏先世於

濰稱素封及君生而家適中落訓導君始以教讀爲養生計是時君世父督家政嘗鬻城內舊居與姻戚陳氏同移居城北曰來章有薄田數十畝君與從兄弟且耕且讀咸豐中南陵何子容避亂於濰一日過訪訓導君見君荷鋤自外歸以爲傭也及進謁侍食語及經史大義君從容應對何先生乃驚歎曰是無媿耕讀世家矣辛酉秋捻匪東犯君隨父避難流河時事起倉猝家中藏粟與陳氏倉並爲無賴者劫奪或議發其罪罪至死君獨與陳氏長老約祕不以聞更乞貸於城中姻戚且分惠諸同難者其後兩家子姓並掇科第人或以爲陰

德之報而君終身未嘗以其事語人也訓導君既由大
挑知縣改教職選青城縣學當之官君令二子更番隨
侍而已獨留家居聚徒講授以謀旨蓄歲終則率子省
侍明歲更易一人往及訓導君奉檄調充灤源書院監
院君更往來濟南蓋積二十餘年以爲常而二子卒能
讀書取科第亦由於此予嘗遇君濟南未久遂別去君
惟一女弟適予同年友高君萬選萬選官章工縣學訓
導夫婦同卒任所君撫其孤後皆成立其長卽春暉也
光緒十五年君居訓導君之喪以瘠卒卒於是年八月
十三日春秋五十有四時二子分應順天山東鄉試逾

月捷報至而君不及見矣始君以子貴 誥封奉政大夫其後恭遇 覃恩晉贈朝議大夫配王氏 誥封太恭人有賢行佐君事舅姑嘗質嫁時衣飾以供旨甘又能以義方教子子四長智檢己丑 恩科舉人臨邑縣學教諭次智枚乙酉選拔貢生吏部七品小京官己丑 恩科順天舉人壬辰進士翰林院編修庚子 簡放

貴州副考官未至改充雲南學政次智楷縣學附生爲從叔父後其季智楨十六歲而殤女二適陳毓秀韓綬正孫三人王太恭人以今歲壬寅正月十八日卒於里第享年六十有九卽以其年某月日合祔於先塋榮成

孫葆田爲之銘曰

田爲大姓世顯于齊篤生耆儒在濰之西孝友勤儉訓導家風君承其教亦克修厥躬惟善無不報迺家有餘慶銘以昭之用示無竟

萬全縣學教諭張君墓誌銘

君諱嗣陶字問船一字濟卿南皮張氏其先由山西洪洞遷居灤縣有名端者再遷至南皮至君十四世矣曾祖父葵馨候選衛千總祖父恪嘉慶十三年 恩科舉人官山東館陶知縣父曾魯廩貢生候選訓導母戈氏馮氏訓導君二子君其仲也君生館陶君署中是時蜀詩

人張問陶船山爲萊州太守故君又字慕萊或曰所慕者蓋古老萊子也生有異稟長而益自刻勵爲學家貧弱冠後卽橐筆爲童子師束修所入非禮不受訓導君卒時君適應試事不得視含歛終身以爲恨遂侍母家居不與學使者試母馮孺人晚年患痺痿君左右奉養飲食衣服必手進而躬翼之歷三年如一日也他人代之輒弗怡母卒營葬事如禮兄殉流寇之亂撫諸子使成立宗族鄉黨稱之同治六年舉於鄉房考爲瑞安黃公體芳聲名大振連應禮部試不得志光緒庚辰大挑二等以教職用君負偉異姿言論威儀有英毅非常之

概嘗慨然思有爲於世憫學者沈溺俗學其教人必以明體達用爲本日從事經史百家之學爲日記若干卷前大學士文達公今湖廣總督宮保公君族父行也皆以國士遇君宮保公巡撫山西總督兩廣皆欲邀君偕行弗果嘗館文達公所有許某者頗通干謁詐受人干金君發其謀文達公稱謝文達公直軍機或勸君入仕君以俛僻得官爲恥其守正不阿皆此類也十四年秋選授萬全縣學教諭縣介山谷中風俗簡陋諸生輟經弗講君在任九年月有課季有考士習振興前後學使者知其賢相待禮有加焉歲俸數百金身後無十金之

產嘗謂子元翰曰吾不以多財累子孫爾宜勉爲端人
正士毋墜我家聲也丙申三月二十八日卒春秋六十
有二喪歸諸生相率送百里外鄉鄰迎喪者皆歎曰天
何奪我張先生之速也卽以其年十月葬所居里北六
里黑龍村之阡配劉宜人禮部主事祝庚女子元翰己
卯舉人今官河南候補知縣歷署澠池甯陵縣能以清
白嗣其家次子元來乙亥 恩科舉人先君卒聘蓬萊
慕氏在室殉節奉 旨旌表幼子殤女二皆適士族孫
六人長宗瑛好學而能文從予遊以父所述事狀求爲
銘距君卒八年矣予聞南皮人言君家先世本富厚至

館陶君以廉吏稱而家乃中落及君而其貧益甚然終身未嘗妄取其持身廉其行介其食報將在子孫嗚乎是可銘也已銘曰

志於古爲近官於世不爲顯何蘊之厚而所施者淺吁嗟君子其諸聖門之狷曰子孫其繼興洵多賢兮縣衍安徽涇縣知縣楊君墓誌銘

楊學博廷幹手其先人事狀與鄉謚議各一冊再拜稽首言曰先府君歿葬一年矣而誌墓之石尙復缺然非敢緩也誠懼託非其人則不足以傳世而行後故必敬待夫世之蓄道德而能文章者今幸而遇先生敢以先

人不朽之名爲託葆田媿謝不遑因念昔歲服官皖江
習聞同僚言吾鄉楊少泉明府居官清直惜其未竟厥
施雖絳吏議以去而涇縣之民至今猶謳思不置少泉
楊君字也按狀君諱志洵一字景蘇又號澹溪其先爲
膠州望族明季有諱大寬者始遷居高密之景芝鎮數
傳至君高祖再徙南院遂家焉故今爲高密人曾祖諱
質祖諱宗官太學生父諱鐸武學生候選衛千總並援
例封贈祖父如其官又以君貴 誥贈奉政大夫妣
于氏鄔氏並 贈宜人君生而端凝自幼好學事親以
孝聞年十七入縣學爲博士弟子員楊氏自太學君以

下三世始皆同居太學君兄弟二人及君身而單傳者
再世太學君撫諸子勤儉有法君與從祖兄弟情好尤
篤見者不知其爲再從兄弟也遭父憂哀毀骨立葬祭
悉依禮經咸豐五年舉於鄉年三十有六矣先是以附
貢生援例候選教職是年春奉委署利津教諭勤於其
職訓士有方越八年又署諸城教諭至此五上春官不
第遂改知縣分發安徽補用於是大亂初平官方不飭
補缺者率出營謀君需次十年清苦自守光緒紀元充
江南鄉試收掌官是年冬循資補涇縣知縣並加同知
銜明年之任涇爲皖南大邑地處叢山中嚮爲粵匪盤

踞者數年城郭爲墟人民逃散君至徂徠安集民氣大
蘇境內多客氓前官治之操切往往生事君從容化導
客民相安邑有汪攀然者爲患鄉曲已久大府名捕不
獲君下車未一月擒而置之獄一邑頌爲神明邑多大
姓好持吏短長君一以廉正視之遂莫不悅服然君爲
政實本於仁厚每治官書必反復推求務得其情而後
已皖南人俗信鬼神尤惑於風水之說君於百姓爭墳
山者必親臨其地傳集兩造剴切宣諭人漸感悟訟事
日稀又以學校爲王政之本嘗倡修文廟與書院立課
士法籌膏火資士風亦蒸蒸日上矣旋因與上官不合

竟中下考解任後負官累數千金遣人歸里鬻產以償
乃得歸其未去涇也僑寓書院民有赴訴者君以謝事
告則曰惟我慈父母能直我冤奈何棄我去其得民如
此而竟不免吏議此吾徒所爲深惜也始君鄉居時當
咸豐初艱難迭生有倚勢凌君者至率眾劫掠室爲一
空君忍不與校亂定後於鄉人無失禮有乞貸者無不
立應旣解組歸里自奉益儉約遇有義舉恆以身先之
負債者貧不能償輒焚其券平生不信醫卜尤不許巫
尼入門晚歲闢小園於先祠旁蒔花種竹客至則煮茗
相對遇田夫野老話桑麻娓娓忘倦會官師行鄉飲酒

禮僉舉君爲大賓光緒二十二年丙申距君始入縣學之歲六十年矣用世俗重游泮水故事屆期率諸新學生釋奠學宮終事無倦容又六年以疾終於寢將卒之前兩月從容訓諸子曰吾生平無他長惟自信能喫虧遇有傾陷肫然相待人亦自化嗚乎觀此言而君之所養可知矣君卒於光緒二十八年七月二十五日距生於嘉慶二十五年二月二十五日享壽八十有三卽以其年冬十一月壬申葬於先塋之次於是鄉之人無遠近相聚議曰先生少承庭訓克孝而友從昆弟同居無閒言旣以孝廉起家教飭子弟不改儒素被服造次必

循家法可不謂慈惠愛親者乎兩任校官一爲令長教
民興學國史待傳罷官後無不自得之意齒宿而德尊
不又所謂行見中外乎請以孝慈爲先生易名其可眾
皆曰然君元配白宜人內閣中書玉佩女繼配高宜人
膠州高振棣女側室關孺人子男五長肇敏縣學生鴻
臚寺序班次廷霖從九品職銜廷傑候選巡檢廷梁候
選府經歷廷霖廷梁俱關孺人生季卽廷榦廩生中式
己丑 恩科舉人甲午會試挑取膳錄官德州學正有
文行與葆田新相知求誌君墓者也女五皆適士族孫
男八其長者已入縣學爲諸生曾孫一尙幼葆田謹據

廷榦所述參以見聞所及爲詳次如右銘曰

官旣非顯道弗克伸惟孝惟友無媿前人施於有政民
譽不忘歸來梓里耄歲翔羊鄉邦所敬士林之則施不
望報茲爲厚德有子多賢懿行克述宏農之後載興高
密

廣西補用知府前翰林院檢討王君墓誌銘

君諱塾字元達萊陽王氏吾友芷庭編修冢子也生十
歲而喪母事繼母以孝謹聞性敦樸沈默寡言兄弟三
人幼者甫七歲而殤與仲弟埴相友愛讀書不待督課
兄弟閒自爲師友父編修君嘗舉以戒埴曰如汝兄乃

可以慰親心汝媿汝兄多矣自編修君卒後家益貧乃
橐筆走四方爲負米計嘗佐前少詹事朱肯夫先生四
川學幕又客廣東廉訪使于公所所謀畫皆得爲治大
體于公倚如左右手後于公官湖北巡撫及調任河南
嘗對人稱其賢能光緒己丑弟埈旣成進士入翰林君
亦以是歲 恩科舉於鄉明年成進士改庶吉士壬辰
散館授檢討歷俸六年戊戌保送知府籤分廣西初至
上官以書生相視及試以事乃知其才可大用辛丑權
守桂林桂林廣西首郡也君在任僅九月清積訟行保
甲法獲著名盜匪百餘官吏爭自振厲百姓安堵時有

巨盜劉連貴者逃入湖南界君懸重賞募人獲之八百
里外其任事勇果皆此類於是大府益賢君未幾百色
廳員缺百色巖邑逼於新寇眾莫敢往巡撫使丁公屬
布政使檄君攝其任君憤眾懦亦慨然思自效乃未及
行而身染時疾遽以壬寅五月二十三日卒年甫五十
有一身後篋餘二十金幾無以殮同官相率贈賻乃得
歸時君弟今翰林院學士埈以國子監祭酒奉命錄
士河南聞訃就別館發哀泣語葆田曰吾昔送兄都門
外兄以性拙直不能合時爲慮予謂世之號爲智巧者
其任事未必能勝於拙直兄以予言爲然嗚呼兄今果

以拙宦終矣且吾父有志未酬而兄今復齋志以歿是
豈徒吾一家之不幸哉惟先生賜之銘則感甚於時葆
田叔弟之喪未除又以事因循未及爲今三年矣會得
學士所爲家傳乃追爲誌敘以俟他日薶諸幽君生於
咸豐二年六月二十九日以卒之明年四月丙申葬於
城北新阡父編修君諱蘭昇母賀氏繼母于氏祖作求
縣學生祖妣柳氏呂氏曾祖寧遠太學生曾祖妣蓋氏
三世皆以學士官階三品遇 覃恩加一級累贈資政
大夫妣皆贈夫人君娶魯氏 誥封恭人子二昌濬縣
學生昌瀛隨宦至桂林先君卒銘曰

幼歷憂患克承先志持躬必端事無輕試壯歲遠遊越
秦入蜀南至兩粵觀風問俗學既大進眾益稱賢有弟
聯步翔回木天晚乃出守思展經綸姦懲墨遺愛在
民有藴未施齋志以終斯人弗壽敢問蒼穹

校經室文集卷五